

Kö'du Yöyö Laka 'ba Yësu ma Yowani ayöru

Me'do 'ba Didi

¹ Mi biyeto aba Me'do ëdi. Me'do ne ëdi Wirï aba ehe tinyö Wirï ra. ² Tëmi biyeto, Me'do ne ëdi Wirï aba. ³ Ehe Me'do nenyë aba, Wirï o'do wa biya. Wa maako o'do dë kazi Me'do ne. ⁴ Didi ayi kazi mo, ehe didi 'bomo i'di bikanyi zi vidi biya. ⁵ Bikanyi ne asesi tanyi mi biköndu, ehe biköndu ayölu dë.

⁶ Wirï utu kora maako ru mo Yowani. ⁷ Mo ayi zi yada kö'du 'ba bikanyi ehe zi gaga vidi biya zi tedi koma aba. ⁸ Yowani ra dë bikanyi nenyë. Mo ayi nje zi yada kö'du 'ba bikanyi ne. ⁹ Bikanyi tinyö mati ayanyi bi da vidi biya, ëdi tayi mi damöku ne.

¹⁰ Me'do ne ëdi mi damöku ne, mora vidi maako ayölu mo dë, Wirï o'do damöku ne le me'do 'bomo aba. ¹¹ Mo ayi gogo mi damöku 'bëni, mora vidi 'bomowe irinni mo dë kalakye-dre aba. ¹² Vidi maakowe ombanni mo ehe i'di koma 'bënni mi mo. Here mo i'di dangölö zi zë, zi tedinni na gisi 'ba Wirï. ¹³ Zë anzanni dë gisi 'ba Wirï, ta da rë zë, mandere ga kö'du komba 'ba vidi köndu, mandere kö'du komba 'ba o'di. Wirï ra na bi dë ni o'do zë na gisi 'bëni.

¹⁴ Me'do ne ayi na vidi köndu, ehe alima kinye ze aba. Dongo ze bikanyi kyedre tinyö 'bomo,

bikanyi kyedre 'ba Wisi nje kölö 'ba 'Bu. Mo ndo rakyëyi ehe tinyö.

¹⁵ Yowani ame'do kö'du mo ehe agbögbö, “Nenye mo mati ma yada zi ye atayi! Mo kyedre ta da ma, ga kö'du mo ëdi na widi gba kazi ma ko'jo.”

¹⁶ Kazi rakyëyi 'bomo diri ze ya'da kayo ¹⁷ Mosa ra i'di kö'du ki'di, mora Yësu Korisito ika zi ze kö'du laka tinyö aba. ¹⁸ Vidi maako gba ongo Wiri de. Nje Wisi kölö ne mo ra tinyö Wiri ehe ëdi kara ra 'Bu, ayada zi ze Wiri ëdi kaa a'di.

*Kö'du kise 'ba Yowani Bapatisi
(Mt 3:1-12; Mk 1:1-18; Lk 3:1-18)*

¹⁹ Vo kalakonda vo yenä 'ba Yude mi Yerusalemä utunni vo karasa maakowe ehe Leviiye zi ha Yowani ko'jo mo 'beni eyi. ²⁰ Mo omba do mo ayada zi ze huwe tinyö henye, “Manza de Korisito ne.” ²¹ Neene ze ako'jonnä ho mo, iyanni henye, “Yi Eliya ra?” Yowani aya'ba henye, “Manza de.” Ze ako'jonnä ho mo iyanni henye, “Yi ra Nebi ne?” Mo aya'ba henye, “E e!” ²² Ndundu mo aba, ze iyanni henye, “Ayada zi ze, yi 'beyi eyi?” Ze iyanni henye, “Zi ze koba hulëhu da kö'du ya'ba 'beyi ne zi vidi mati utunni ze.”

²³ Yowani aya'ba da me'do temi me'do kiya 'ba nabi Yisaya. “Ma nje vidi ma edi mbere mi da lipi, ‘O'de geri nzo zi Yere!’” ²⁴ Kya 'ba Farasi maakowe utunni ze kpa zi Yowani. ²⁵ Ze ako'jonnä ho mo, iyanni henye, “Kö'du a'di edi vidi bapatisi, ezë anza de Korisito mandere Eliya mandere Nebie?”

²⁶ Yowani ayada zi zë iya henye, “Mo'do bapatisi wini aba, mora ëdī yë aba kinye, vīdī maako ayɔle dë. ²⁷ Mayi le dagba, manza dë na laka zi kamoka 'bɔmowe kinga.” ²⁸ Yowani iya nenye mati mo ëdī bapatisi kī'dī humirë 'ba Ranga Yeredene mī Beteniya.

Timëlë 'ba Wiri

²⁹ Mī ko'do ma ta go mo, Yowani ongo Yësu ëdī tayi zi nī, ehe iya henye, “KinYE ëdī Timëlë 'ba Wiri mati oba kö'du yaɲa 'ba damöku ne 'de. ³⁰ Mo ra mati ma yada kö'du mo zi ye henye, ‘Vidī maako atayi kpa, mo kyedre ta da ma, ga kö'du mo ëdī na wīdī gba kazi ma ko'jo.’ ³¹ Ma yɔlo dë, mo 'bëni ëyi. Mora mayi zi ye bapatisi wini aba, here vīdī biya mī Yiserele akongo mo. ³² Ma mēdī ani ehe mongɔ Lawo Laka ayi akaɲo dɔ mo kaa atu'bu ta komoriyë, ehe Lawo Laka ne alima dɔ mo. ³³ Gba kazi nenyE ma yɔlo dë ëyi 'bëni mo. Mora mo mati utu ma zi bapatisi kī'dī wini aba ne ayada zi ma henye, ‘Akongo Lawo Laka tayi akaɲo ehe lima da vīdī maako. Neene akayɔlo henye, mo ra vīdī mati akī'dī bapatisi Lawo Laka aba.’ ³⁴ Mongɔ nenyE o'do rë nī, ehe ma yada zi ye henye, mo Wisi 'ba Wiri ra.”

Dagba vo lö'böwë 'ba Yësu

³⁵ Ko'do vere aba, Yowani ëdī ani löhu ehe vo lö'bö 'bɔmowe riyo ëdinni mo aba. ³⁶ Mati mo ongo Yësu lasi ta dakapa, mo iya henye, “KinYE ëdī Timëlë 'ba Wiri!” ³⁷ Vo lö'bö 'ba Yowani riyo owonnī me'do 'bɔmo ne, ehe zë i'bënni Yësu aba. ³⁸ Mati Yësu opi rë nī ehe ongo zë, mo ako'jo kö'du henye, “A'di ra ombe?” Zë aya'banni dɔ

mo iyanni henye, “Raboni, alima kila?” Mi ha 'ba Hibiru, “Raboni ne,” “Vo komoyandi” ra. ³⁹ Yësu aya'ba do mo iya henye, “Ayi onge te.” Eëdi ku nzo kaa kadra sowo mi kadra kutë mati zë i'bënni mo aba ehe ongönni bi ma mo alima 'domo. Here zë alimanni nduwë mi ndundu 'ba kadra ne. ⁴⁰ Kölö tēmi kora riyö ma owo ha Yowani ehe i'bë Yësu aba ra Anderiya, öndu 'ba Simona Petero. ⁴¹ Dagba kö'du mati Anderiya o'do, eëdi zi koma öndu ni ehe yada zi mo henye, “Di'ja Masiya ne ku!” Mi ha 'ba Hibiru, “Masiya ne” kpa te kaa mi ha 'ba Girigi “Korisito ne.” ⁴² Anderiya ika öndu ni zi Yësu. Mati Yësu ongo mo, mo iya henye, Simona wisi 'ba Yowani, akako'jo yi Kapahasi. Ru nenyë ato'bo kidra na “Petero.”

Yësu ako'jo Pilipo ehe Natanële

⁴³⁻⁴⁴ Mi ko'do vere aba Yësu omba zi ti'bë Galilaya. Ani mo i'ja Pilipo, mo ta Beteseyida, gawo lijo 'ba Anderiya, Petero aba. Yësu iya zi Pilipo, “Usu ga ma.” ⁴⁵ Pilipo i'ja Natanële ehe iya henye, “Di'ja ze vere mati Mosa ehe Nëbiyë ayörunni kö'du mo ne ku. Mo Yësu, wisi 'ba Yosepa ta Nazereta.”

⁴⁶ Natanële ako'jo kö'du iya henye, “Wa laka maako ato'bo tayi ta Nazereta?” Pilipo aya'ba do mo iya henye, “Ayi ongo te.” ⁴⁷ Mati Yësu ongo Natanële eëdi atayi zi ni, mo iya henye, “Kinye eëdi tinyö kozo zutu 'bezee 'ba Yiserere, ehe mo anza de na vo wakoba.”

⁴⁸ Natanële ako'jo ho mo iya henye, “Hala ayolo ma?” Yësu aya'ba do mo iya henye, “Gba kazi Pilipo yi ko'jo, mongö yi hu kaga kyëlu.”

⁴⁹ Natanëlë iya henye, “Raboni, yì Wisi 'ba Wiri ehe Yere 'ba Yiserele!”

⁵⁰ Yësu aya'ba dɔ mo iya henye, “Oma mi ma nje ga kö'du mati miya henye, mongo yì hu kaga kyëlu? Akongo wa maako kyedre ndra ta da ma nenyë. ⁵¹ Ma yada zi yì, akonge komoriyë akayëhu rë ni ehe malayike 'ba Wiri ti'bë riyë ehe tayi akaŋo da Wisi 'ba Vidi.”

2

Oze mi Kana

¹ Ko'do wota aba yaa Mariya, ma 'ba Yësu ëdi mi karama 'ba rakoze mi gawo 'ba Kana mi Galilaya. ² Yësu vo lö'bö 'bëniyë ëti, ise zë kpa bi 'ba rakoze ne. ³ Mati a'ji inde rë ni ku biya, ma 'ba Yësu iya zi mo henye, “Zë anzanni kpe a'ji aba.” ⁴ Yësu aya'ba dɔ mo iya henye, “Ma ma, ayada dë zi ma a'di ra zi ko'do. Kadra 'bama gba ɔko dë.” ⁵ Ma 'ba Yësu ayada zi vo lituwë 'ba liŋɔ henye, “O'de wa mati mo ayada zi ye ko'do.”

⁶ Yude ëdinni kö'du kira 'ba wa kaka ŋbala aba ehe ga kö'du nenyë, tele yitö 'ba wini ëdi ani modaka ma kölö ëdi kyedre zi kiri kaa lita lamikölö. ⁷ Yësu iya zi vo lituwë 'ba liŋɔ henye, “Osowe tele nenyee wini aba.” Zë osonni zë kpika ⁸ ehe mo ayada zi zë henye, “Yaanya aba oba kya 'ba wini ne yaga ehe i'di zi kora vo kyeti karama ne.” Zë obanni wini ne zi mo ⁹ mati yaanya aba ofo rë ni ku na a'ji ehe mo anene. Mo ayolo dë a'ji nenyë ayi ta kila, mora vo lituwë mati obanni a'ji nenyë ayolanni, here mo ako'jo 'biyësi ¹⁰ ne ehe iya zi mo henye, “Vidi biya uwënni a'ji ma

laka ra dagba, ehe tapëti mo, mati yingɔ ëdinnï ku kyɔ mo aba zi kuwë, mo i'di a'ji ma kɔɔ ne. Mora asesi wëyi a'ji ma laka ne le yaanya aba!”

¹¹ Yësu o'dɔ dagba kyinë 'ba kö'du koro nenyë mi gawo 'ba Kana mi Galilaya. Ani mo ayada bikanyi kyedre 'bëni, ehe vo lö'bö 'bɔmowe omani mi mo.

¹² Tapëti ma nenyë, Yësu ehe ma mo, öndu mowe, ehe vo lö'bö 'bɔmowe i'bënni zi Kapanamo, ehe alimanni ani ko'do tisi aba.

Yësu i'bë mi yëkëlu

(Mt 21:12-13; Mk 11:15-17; Lk 19:45-46)

¹³ Ëdi ku kadra kara zi karama 'ba Yude 'ba laga 'ba koli, Yësu i'bë zi Yerusalema. ¹⁴ Ani mi yëkëlu mo i'ja vidi ëdinni isa, timëlë, ehe atu'buwë kogo, ehe vo kôhi kutrëë kpa limanni da tarabiza 'bënni. ¹⁵ Here mo o'dɔ so'da tëmi kɔ'di ehe ore ngötu biya yaga tëmi yëkëlu, 'dö timëlë, ehe isa, mo opi da tarabiza 'ba vidi 'ba kôhi kutrëë, apere kôhi nbiriri 'bëzë ne, ¹⁶ ehe mo i'di kö'du zi vidi ma ëdinni atu'bu kogo ne henye, “Obe atu'buwë yaga ta kinye! O'de loko 'ba 'Bu ma dë na bi 'ba wakogo!” ¹⁷ Vo lö'bö 'bɔmowe asösunni henye, wayöru iya henye, “Watɔwɔ 'bama kö'du loko 'bëyi, o'bo mi ma kaa wa'do.”

¹⁸ Vo kalakonda 'ba Yude aya'banni dɔ mo kö'du ko'jo aba henye, “Kyinë 'ba kö'du koro a'di ra atɔ'bo ko'do zi yada zi ze ëdi dangölö aba tinyö zi nenyë ko'do?”

¹⁹ Yësu aya'ba dɔ mo iya henye, “Iha akaŋo yëkëlu nenyë ehe mi ko'do wota aba ma ko'ba löhu!”

20 Vo dagbe aya'banni henye, “İri koo 'butësowo domomodaka zi ko'ba yëkëlu nenyè. A'di ra o'do yi zi sösu ato'bo ko'ba ko'do wota aba löhu?”

21 Mora Yësu ëdi ame'do kö'du ida rë ni ra na yëkëlu. 22 Mati injë mo ku tëmi koli, vo lö'bo 'bomowe asösunni kö'du mati ayada zi zë. Neene zë omanni mi wayöruwë ehe mi me'do 'ba Yësu. 23 Mi Yerusalema mi kadra karama 'ba laga 'ba koli, vidï kayo omanni mi Yësu, ga kö'du zë ongönni mo ta bi kyinë 'ba kö'du korowe ko'do. 24 Mora Yësu ayolo kö'du mati mi di'di zë, ehe mo ila zë dë zi tedi kyigo aba ndra ta dë ni. 25 Vidï maako anza zi yada zi mo a'di ra vidiyë kaa mo. Mo ayolo ku nzo.

3

Yësu ehe Nikodimö

1 Ani vo dagba 'ba Yude ëdi ru mo Nikodimö mo Farasi ra. 2 Yondo kölö maako aba mo i'bë zi Yësu iya zi mo henye, “Raboni, da yolo ku Wiri utu yi zi komo ze yandi. O'bo dë kyin 'ba kö'du koro nenyee ko'do, nje ezë Wiri ëdi yi aba.” 3 Yësu aya'ba do mo iya henye, “Mëdi kö'du tinyö ra yada zi yi vidï maako o'bo dë damöku 'ba Wiri kongö kazi mo ko'jo löhu!” 4 Nikodimö ako'jo iya henye, “Hala kora ma övu ku kyedre ne ako'jo löhu? Mo o'bo dekpe tödu mi ma ni löhu zi ko'jo mi kadra ma riyo mo!”

5 Yësu aya'ba do mo henye, “Mëdi ayada tinyö zi yi” Vidï maako o'bo dë tödu mi damöku 'ba Wiri, kazi ko'jo mo wini aba ehe Lawo Laka.

6 Vidï köndu o'jonnï gisi 'bënni. Nje Lawo Laka

'ba Wirī o'jo gisi 'ba Wirī. ⁷ Anza dē na rakaga ga kō'du mati miya henye, ako'jo yī lōhu. ⁸ Lawo 'ba Wirī ēdī kaa buluku mati aluku bi mati omba tī'bē zi mo. Atō'bo kowo kpɔɔ buluku, mora ayɔɔ dē ayi ta kila mandere ēdī tī'bē kila. Ēdī here biya zi vidī ma o'jo Lawo aba.

⁹ Nikodimō ako'jo kō'du iya henye, “Hala nenyē atēdī?” ¹⁰ Yēsu aya'ba dɔ mo iya henye, “Hala atō'bo zi tēdī na vo komoyandi 'ba Yiserele ehe ayɔɔ wa nenyēe dē? ¹¹ Ma yada zi yī tīnyō, dēdī ame'do kō'du wa ma da yɔɔ, ga kō'du dongɔ ku na bi de ze. Mora vidī maako tēmī yē akīrī kō'du kiya 'beze ne dē. ¹² Ēzē oma dē mati ma me'do zi yī kō'du wa 'ba dakaŋo, hala akoma ēzē ma me'do zi yī kō'du wa 'ba komoriyē? ¹³ Vidī maako gba i'bē dē komoriyē, nje Wisi 'ba Vidī, mati ayi akaŋo ta ani.”

¹⁴ “Ehe here Wisi 'ba Vidī akīnjē riyē, kaa moɔɔ wiri kōhi mati Mosa injē riyē mī da lipī. ¹⁵ Neene vidī biya mati ēdī koma aba mī Wisi 'ba Vidī atēdī dīdī ŋburu aba. ¹⁶ Wirī ɔwɔ damōku nenyē ndra, here mo i'dī Wisi kōlō 'bēnī ne, here vidī mati oma mī mo ēdī dīdī ŋburu aba, ehe tīnyō oli dē. ¹⁷ Wirī utu Wisi 'bēnī ne dē ga kō'du mo omba zi ko'dɔ vurē 'ba damōku, mora ga kō'du mo omba zi yomɔ damōku ne kpuru wisi 'bēnī aba.”

¹⁸ “Zē mati omannī mī Wisi ne, o'dɔ vurē kyēnyē dē rē zē, mora zē mati omannī dē o'dɔ vurē 'bēzē ku nzo, ga kō'du omannī dē mī Wisi nje kōlō 'ba Wirī ne. ¹⁹ Bikanyi ayi mī damōku, mora vidī ombannī zi lese mī bikōndu ga kō'du zē ēdīnnī kō'du kyēnyē ko'dɔ. Nenyē ra ēdī hala

o'do vurë rë zë. ²⁰ Vidī ma ēdinnī kō'du kyēnyē ko'do, iyinnī bikanyi ehe ayinnī dē zi bikanyi, ga kō'du ayada wa mati zē ēdinnī ako'do ēdī na kyēnyē. ²¹ Mora vidī biya ma alima tīnyō aba, atayi zi bikanyi ga kō'du zē ombannī agamowe zi yolo henye, Wirī ēdī ko'do kpuru zē aba.”

Yēsu ehe Yowani Bapatisi

²² Tapēti ma nenye, Yēsu ehe vo lō'bō 'bēniyē eti i'bēnnī zi dakaŋo 'ba Yudiya, bi mati mo alima tisi zē eti ehe bapatisi kī'dī aba. ²³ Yowani ēdī kpa bapatisi kī'dī mī Anono anza dē na kowo ta ra Salima, ga kō'du wini ēdī bi nani. Vidī ēdī tī'bēnnī zi mo ehe mo ēdī zē bapatisi. ²⁴ Nenyē gba kazi Yowani kī'dī mī kamba. ²⁵ Kya vo lō'bō 'ba Yowani maakowe ayeto hē nnī wasa kora Yuda maako aba, kō'du 'ba wa kaka ŋbala ga kō'du kō'du kī'dī 'ba yēni. ²⁶ Here zē i'bēnnī zi Yowani ehe iyannī henye, “Raboni, asōsu kō'du kora mati ēdī yī aba dakapa humirē 'ba Ranga Yeredene, mo mati ēdī kō'du mo kiya? Here mo ēdī bapatisi kī'dī yaanya aba, ehe vidī biya ēdī tī'bēnnī zi mo.”

²⁷ Yowani aya'ba do mo iya henye, “Vidī maako o'bo dē zi tēdī wa maako aba nje ezē Wirī ra i'dī zi mo. ²⁸ E ra na vo kiya 'bama mati miya henye, ‘Manza dē Korisito ra, mora utu ma dagba komo mo.’ ²⁹ 'Biyēsī ra mati mbara ne na 'bomo, mora aboka 'ba vo 'biyēsī mati owo dakapa mbili ni koze, ēdī na rakyenyi mati mo owo gu 'biyēsī. Nenyē ēdī hala rakyenyi 'bama o'do ku ti'de. ³⁰ Mo atayi ndra kyedre, mora ma tayi tisiwa aba.”

Mo ma ayi ta komoriyë

³¹ “Mo ma ayi ta komoriyë ëdï kyedre ta da wa biya. Mo mati 'ba dakaŋo, mo zi dakaŋo ehe ame'do kö'du wa 'ba dakaŋo. Mora mo ma ayi ta komoriyë ëdï kyedre ta da wa biya. ³² Mo ayada wa ma mo ongo ehe owo, du vidï maako oma dë mi kö'du kise 'bomo ne. ³³ Mora vidï mati oma mi kö'du kise 'bomo nenyë ayada henye Wirï ëdï tïnyö. ³⁴ Mo ma Wirï utu ame'do me'do 'ba Wirï ga kö'du Wirï i'di zi mo Lawo ndo 'bëni ku. ³⁵ 'Bu owo Wisi 'bëni ehe i'di kyigo 'ba wa biya zi mo. ³⁶ Vidï ma oma mi Wisi ne, ëdï didi ŋburu aba, vidï ma oro Wisi ne dë atanza dë didi ŋburu aba, mora akalima hu wayaza 'ba Wirï.”

4

Yësu mbara Samariya aba

¹ Farasiye owonni henye, Yësu ëdï ku laga dagba ehe bapatisi ki'di zi vo lö'böwë ndra ta da Yowani. ² Tïnyö Yësu abapatisi vidï kölö maako dë, nje vo lö'bö 'bomowe ra o'donni. ³ Mati Yësu owo kö'du mati ëdï akiya ne, mo ila Yudiya ehe i'bë hulëhu zi Galilaya. ⁴ Ta da gëri 'bomo ani, mo omba zi ti'bë kpuru ta Samariya.

⁵ Mi Samariya mo ayi zi gawo maako ru mo Seka, anza dë na kowo ta ra yaka mati Yakoba i'di zi wisi 'bëni Yosepa. ⁶ Ku'ju 'ba Yakoba ëdï ani, ehe Yësu na riti ta bi lasi, alima akaŋo dakapa ku'ju ne. Ëdï kaa kadra kutë here.

⁷ Mbara vidï 'ba Samariya maako ayi zi wini kuwu, ehe Yësu iya zi mo henye, “i'di wini kuwë

zi ma.” ⁸ Vo lö'bö 'bomowe i'bënni ku mi gawo zi wakonyo kogo.

⁹ Mbara ne aya'ba do mo henye, “Yi Yuda ra ehe ma vidi 'ba Samariya ra, hala atob'o ko'jo ha ma ko'du wini kuwe?” Yude uwenni wini de temi siko kole vidi 'ba Samariya eti.

¹⁰ Yesu aya'ba do mo henye, “Eze ayalo nje wa ma Wiri i'di, ehe eyi ra edi he yi ko'jo ko'du wini kuwe, ako'jo ho mo, ehe mo aki'di zi yi wini mati i'di didi.”

¹¹ Mbara ne iya henye, “Kyedre, anza kpa de kyere wini aba, ehe ku'ju ne edi na yöndu. Ta kila aki'ja wini mati i'di didi? ¹² Zutu 'beze Yakoba ra ole ku'ju nenyé zi ze, mo gisi 'beniyé eti ehe ngötu 'bomowe uwenni biya temi mo. Yi kyedre ta da Yakoba?”

¹³ Yesu aya'ba do mo iya henye, “Vidi biya ma uwe wini nenyé atedi na kodro löhu, ¹⁴ mora vidi ma uwe wini mati ma ki'di zi mo atanza de na kodro löhu. Wini mati ma ki'di zi mo atayi mi mo na ku'ju mati aki'di zi mo didi ma nburu.”

¹⁵ Mbara ne aya'ba do mo iya henye, “Kyedre, i'di zi ma wini nani! Here ma tanza de na kodro löhu, mandere kazi ma tayi kinye zi wini kuwu.”

¹⁶ Yesu ayada zi mo iya henye, “I'be ako'jo kora 'beyi ehe ayi löhu.” ¹⁷ Mo aya'ba do mo iya henye, “Manza de kora aba.” Yesu aya'ba henye, “Ko'du 'beyi ne tinyo mati iya henye anza de kora aba ne. ¹⁸ Oze yi ku zi kora muyi, ehe kora ma edi lima mo aba yaanya aba ne anza tinyo kora 'beyi ra de. Ayada zi ma ko'du tinyo ra.”

¹⁹ Mbara ne iya henye, “Kyedre, mong'o yi nebi ra. ²⁰ Zutu 'ba Samariya amötunni Wiri da doku

nenye, mora e Yude iye henye, Yerusalema ra bi ma da kamötu zi Wiri.”

²¹ Yësu iya zi mo henye, “Oma mi ma, mbara, kadra mo edi atayi mati vidi amötunni 'Bu dekpe da doku nenyè mandere mi Yerusalema. ²² E Samariye ayole de tinyo eyi ra edi ye amötu, mora ze Yude, da yolo ku eyi ra dede motu, ga kö'du edi kazi Yude ra vo wayomo ayi. ²³ Mora kadra mo edi tayi, ehe edi ku nzo kinye, mati kyigo Lawo 'ba Wiri aba vidi akamötunni 'Bu kaa mo tinyo edi, ki'di zi mo motu ma tinyo mati mo omba. ²⁴ Wiri edi Lawo ra, ehe nje kyigo 'ba Lawo 'bomo aba vidi ato'bo motu mo kaa mo tinyo edi.”

²⁵ Mbara ne iya zi mo henye, “Ma yolo ku Masiya ne atayi, ehe ezè mo ayi, mo akayada zi ze wa biya.” ²⁶ Yësu aya'ba henye, “Ma ra mo, ma ra mo mati edi ame'do yi aba yaanya.”

²⁷ Mi kadra nani vo lö'bö 'ba Yësu a'banni, ehe zè na rakaga zi ki'ja mo edinni ame'do mbara aba. Mora vidi maako temi zè ako'jo ha mbara ne de, “A'di ra omba?” Zè ako'jonnì ha Yësu de, “Kö'du a'di ediyè ame'do mbara ne aba?”

²⁸ Mbara ne ila tele wini 'beni ne i'be hulèhu mi gawo, ehe iya zi vidiyè ani henye, ²⁹ “Ayì onge kora ne, mo ayada zi ma biya wa mati mo'do! Mo atedi Korisito ra?” ³⁰ Zè ilanni gawo ehe i'benni zi kongö Yësu.

³¹ Mi kadra ne vo lö'böwè alenzenni Yësu iyanni zi mo henye, “Raboni, oba wa maako zi konyo!” ³² Mora mo aya'ba henye, “Medi wakonyo maako aba ayole kö'du mo de.”

³³ Here vo lö'böwë ayetonni, kö'du ko'jo tëmì kutë nni na bi dë nni, “Vidi maako ika wakonyo ku zi mo?” ³⁴ Yësu iya zi zë henye, “Wakonyo 'bama ëdi zi koro kö'du 'ba Wiri mati utu ma ehe zi kinde loo mati mo i'di zi ma zi ko'do. ³⁵ Akiye henye, ‘ëdi gba yehe sowo zi wakumu ta yaka.’ Mora ma yada zi ye henye, ongö bi te na laka da yake, wa mi yaka yaanya aba ahi ku, ehe ku nzo zi kumu. ³⁶ Vidi mati umu ehe atoto do mo ika ku zi didi ma nburu nburu, ehe agamo mati ili ehe mo mati umu aba, atëdinni na rakyenyi bi kolö. ³⁷ Kö'du kiya ne ëdi tinyö, ‘Maako iyi, agamo umu.’ ³⁸ Mutu wë zi nyenyo kumu mi yaka mati o'do loo mo dë. Vidi maakowe o'donni loo ani, ehe i'je wa kyo tëmì loo 'bëzë ne.”

³⁹ Vidi kayo 'ba Samariya mi gawo nani omanni mi Yësu ga kö'du mbara ne iya henye, “Mo ayada zi ma biya wa ma mo'do.” ⁴⁰ Here mati vidi 'ba Samariye ayinni zi mo, zë alenzenni mo zi lima nni aba, ehe Yësu alima ani ko'do riyö aba.

⁴¹ Vidi kayo 'ba Samariya maakowe omanni ga kö'du 'ba kö'du kise. ⁴² Zë iyanni zi mbara ne henye, “Doma ku yaanya aba, anza dë ga kö'du mati iya, mora ga kö'du ze na bi de ze dowo mo ku, ehe da yolo henye, mo ra tinyö ëdi vo yomo 'ba damöku.”

Yësu akö'jo Wisi 'ba vo mi turu maako

⁴³ Tapëti ko'do riyö aba ani, Yësu ila bi nani ehe i'bë zi Galilaya. ⁴⁴ Kö'du mo na bi dë ni iya henye, nëbi owö dë mi dakaño 'bomo. ⁴⁵ Mati mo oko mi Galilaya, vidi karani irinni mo kalakyedre aba, ga kö'du zë i'bënni mi karama 'ba laga 'ba

koli mi Yerusalema ehe ongonnī biya wa mati mo o'do.

⁴⁶ Mati Yēsu a'ba zi Kana mi Galilaya, bi mati mo opi wini na a'ji. Vo mi turu maako ēdī ani wisi 'bomo na koo mi Kaparanamo. ⁴⁷ Mati mo owo henye, Yēsu ayi ku ta Yudiya zi Galilaya mo i'bē zi mo ako'jo ho mo zi ti'bē Kaparanamo ehe zi ko'jo wisi 'bēni, mati mo ku kara zi koli. ⁴⁸ Yēsu iya zi mo henye, “Vidi maako tēmī yē oma dē nje ēzē onge kyinē 'ba kō'du korowe ehe rakage.” ⁴⁹ Kora vo mi turu ne aya'ba do mo henye, “Yere, ayi gba kazi wisi ama koli.”

⁵⁰ Yēsu iya zi mo henye, “I'bē wisi 'bēyi akadīdī.”

Kora ne oma mi me'do 'ba Yēsu, ehe i'bē gbo.

⁵¹ Da gērī 'bomo liṅo vo lītu 'bomowe andosi dē nni mo aba kō'du kise aba zi mo. “Wisi 'bēyi ēdī ku zi ti'bē zi didī!”

⁵² Mo ako'jo hē zē iya henye, “Kadra vala ra mati wisi 'bēni ne na laka?” Zē aya'banni henye, “Ēdī ndī kadra kōlō mataganya tapēti kadra kutē mati rakyītu ne ila mo.” ⁵³ Here 'bu mo asōsu ēdī mi kadra kōlō nani mati Yēsu ayada zi nī, “Wisi 'bēyi akadīdī.” Here mo ehe biya vo dakota 'bēni ēti omani gbo. ⁵⁴ Nenyē kyinē 'ba kō'du koro ma riyō mati Yēsu o'do tapēti tayi 'bomo ta Yudiya zi Galilaya.

5

Wako'jo mi kara

¹ Tapēti ma nenyē, Yēsu i'bē mi Yerusalema, kō'du karama yēni 'ba Yude. ² Kara Haresi

kyedre 'ba timëlë mī Yerusalema, kara maako ëdī ani sënjë aba muyī, mī ha 'ba Hībīru ako'jo Betesata. ³⁻⁴ Vīdī kayo 'ba rakɔɔ ëdīnnī ko'do ha kara ne, vo komokōndu, vo ka'bo, ehe vīdī vo keņe. ⁵ Dakapa kara ne kora maako ëdī na rakɔɔ, kɔɔ 'butëwota ðomomodomowota aba. ⁶ Mati Yësu ongɔ kora ne ehe ayɔɔ henye mo ëdī ku na keņe kyere kadra konda aba, mo ako'jo hɔ mo henye, “Omba zi yī kɔ'jo?”

⁷ Kora ne aya'ba ðo mo iya henye, “Kyedre, manza ðë vīdī maako aba zi kī'dī ma mī kara ne, ëzë wini ne ëdī rë nī kɔhɔ riyë. Ma yɔnzɔ zi tōdu mī mo, mora vīdī maako kpa 'duwī atōdu ani dagba.”

⁸ Yësu ayada zi mo henye, “Ënyī riyë, oba agburuku 'bëyī ehe lasi!” ⁹ Kandi ako'jo kora ne gbɔ. Mo oba agburuku 'bënī riyë ehe ayeto lasi toko. Ko'do mati kō'du ne o'do rë nī mī mo ne kadra 'ba ko'do madomoriyō. ¹⁰ Mati vo dagbe 'ba Yude ongɔnnī kora ne ëdī agburuku 'bënī kinjë, zë iyannī zi mo henye, “Nenye ko'do 'ba ralawo ra! Omba ðë zi vīdī maako zi kinjë agburuku mī ko'do 'ba ralawo.”

¹¹ Mora mo aya'ba ðo mo iya henye, “Kora mati ako'jo ma ne ayada zi ma kinjë riyë agburuku 'bama ehe lasi.”

¹² Zë ako'jonnī hɔ mo iyannī henye, “Ëyī ra kora nenye mati ayada zi yī, zi kinjë riyë agburuku 'bëyī ehe lasi?”

¹³ Mora mo ayɔɔ ðë, ga kō'du Yësu i'bë wënī 'de liwo ga kō'du vīdī kayo.

¹⁴ Yaa Yësu i'ja kora ne mī yëkëlu ehe ayada zi mo, “Ongɔ te, yaanya aba rë yī ëdī ku na laka,

mora o'do kö'du kyënyë dekpe mandere kö'du kyënyë maako ndra ako'do rë ni zi yi.”

¹⁵ Kora ne i'bë ayada zi vo dagbe 'ba Yude henye, Yësu ra ako'jo ni. ¹⁶ Zë ayetonnï kö'du kyënyë maako ko'do zi Yësu ga kö'du mo o'do wa kaa ma here ne mi ko'do 'ba ralawo. ¹⁷ Mora Yësu iya henye, “Bu ma ɔɔ də ta bi loo ko'do, ehe nenyë ra hala mëdi nduwë ko'do.”

¹⁸ Yaanya aba vo dagbe 'ba Yude ombanni zi Yësu kofɔ ga kö'du riyo. Ma dagba, mo owe kö'du ki'di 'ba mi ko'do 'ba ralawo. Mora ma kyënyë ndra, mo iya henye Wiri 'Bu ni ra, mati o'do ni kpiliri Wiri aba.

Kalakonda 'ba Wisi

¹⁹ Yësu ayada zi vidiyë iya henye, “Ma yada tinyö zi ye, Wisi o'do wa maako də na bi də ni. Mo ato'bo nje ko'do wa ma mo ongo 'Bu edi ko'do ga kö'du mo o'do kpa te wa ma mo ongo 'Bu o'do.

²⁰ 'Bu ɔwo Wisi ehe ayada zi mo biya wa ma mo o'do. 'Bu akayada zi mo wa kyedre maako ndra ta da ma nenyë, ehe atëdiyë na rakaga. ²¹ Kaa 'Bu injë yöku ehe i'di didi, here Wisi i'di didi zi vidi mati mo omba. ²² 'Bu o'do vurë 'ba vidi maako də, mora mo o'do Wisi 'bëni ra na vo vurë 'ba vidi ko'do biya. ²³ 'Bu o'do nenyë ga kö'du vidi biya zi Wisi koro kpa kaa zë oronni ni. Èzë vidi maako omba də zi Wisi koro, nenyë kpa te kaa mo omba də zi koro 'Bu mati utu mo.”

²⁴ “Ma yada tinyö zi ye henye, vidi ma owo kö'du kise 'bama ehe edi koma aba mi mo mati utu ma edi lawo didi ma nburu nburu aba, ehe o'do vurë kyënyë də ro mo. Zë i'bënni ku nzo tëmi koli zi didi. ²⁵ Ma yada tinyö zi ye henye,

kadra ne atayi ehe ëdi ku nzo kinye mati yöku biya akowo gu 'ba Wisi 'ba Wiri, ehe zë mati owonni ho mo, akalimanni. ²⁶ 'Bu ëdi kyigo aba zi didi ki'di, ehe mo i'di kyigo kolö nani zi Wisi. ²⁷ Ehe mo i'di zi Wisi 'bëni dangölö zi vure 'ba vidi ko'do biya, ga kö'du mo Wisi 'ba Vidi. ²⁸ Re maga dë! Kadra mo atoko mati biya yöku akowo gu 'ba Wisi 'ba vidi, ²⁹ ehe zë atayinni yaga temi dawogo'bënni. Vidi biya ma o'donni kö'du laka atënyinni na didi, mora vidi biya ma o'donni kö'du kyënyë atënyinni na didi ehe ako'do vure kyënyë 'bëzë."

³⁰ "Mo'bo dë wa maako ko'do na bi da ma. 'Bu ra utu ma, ehe mo ra ayada zi ma hala zi vure ko'do. Mo'do vure 'bama na laka, ga kö'du moro mo, ehe mo'do dë wa mati momba zi ma ko'do."

Vo kiya 'ba Yësu

³¹ "Ëzë ma me'do ga kö'du ma, gëri maako anza dë ani zi yada mëdi kö'du tnyö ra yada. ³² Mora vidi maako ëdi kpa ame'do kö'du ma, ehe ma yolo wa mati mo iya ëdi tnyö. ³³ Utuwë vo lituwë zi Yowani, ehe mo ayada zi zë kö'du tnyö. ³⁴ Ma lima dë ra kö'du mati vidi iyanni kö'du ma, mora ma yada wa nenye zi ye here, zi ye yomo. ³⁵ Yowani, lamba mati i'di bikanyi kyö, ehe, e na rakyenyi zi lima mi bikanyi 'bomo ne tisiwa. ³⁶ Mora vidi maako ndra ta da Yowani ame'do kö'du ma. Mo'do ne wa mati 'Bu ma i'di zi ma ko'do. Wa biya mati mo'do ayada henye 'Bu ra utu ma. ³⁷ 'Bu mati utu ma, ame'do kpa kö'du ma, mora owowe gu mo dë mandere kongö mo da komo da komo. ³⁸ Ome kö'du kise omo dë,

ga kö'du ombe dë zi tēdī koma aba mī mati mo utu. ³⁹ Ome wayōruwē, ga kö'du asōsuwē henye, aki'je dīdī ŋburu ŋburu mī zē. Wayōruwē ayada kö'du ma, ⁴⁰ mora ombe dë zi tayi zi ma kö'du dīdī ma ŋburu ŋburu.”

⁴¹ “Momba kö'du wayeto 'ba vīdī kōndu dë, ⁴² mora ma yolo e, vīdī ma kōlō tēmī yē, zi Wīrī tōwō anza dë kalakyedre aba. ⁴³ Mayi ku kalakonda 'ba 'Bu ma aba, ehe iriyē ma dë. Mora akiriyē vīdī ma ayinnī na bi dë nni. ⁴⁴ Hala akome? Ombe zi wayeto kirī kazi oka ma kōlō maako, mora ayōnze dë zi tēdī wayeto aba kazi Wīrī mati ēdī kōlō ne, hala ato'be koma mī ma? ⁴⁵ Asōsuwē dë henye, ma ra vīdī ma akasusu wē zi 'Bu. Ī'diyē kö'du sōsu 'be ra Mosa, le mo ra vīdī ma akasusu wē. ⁴⁶ Mosa ayōru wa kö'du ma, ehe ēzē ome mī Mosa, akome mī ma. ⁴⁷ Mora ēzē ome dë mī wa mati Mosa ayōru, hala ato'be koma mī wa mati miya?”

6

*Yēsu ĩ'dī wakonyo zi vīdī kpulukumuyī
(Mt. 14:13-21; Mk 6:30-44; Lk 9:10-17)*

¹ Tapētī ma nenye Yēsu umu kyētī Fōfō 'ba Galilaya, mati ayolo kpa na Fōfō 'ba Tiberiyasi. ² Vīdī kayo usunnī go mo ga kö'du ongōnnī mo ēdī kyinē 'ba kö'du korowe ko'do zi ko'jo vo koe. ³⁻⁴ Kara zi kadra karama 'ba laga 'ba koli 'ba Yude, Yēsu ĩ'bē riyē da dōku vo lō'bō 'bēniyē eti ehe alima akaŋo. ⁵ Mati Yēsu ongo vīdī kayo tayinnī zi nī, mo ako'jo ha Pilipo iya henye, “Ta kila da ki'ja ze wakonyo kyō zi to'bo vīdī nenye

biya?” ⁶ Mo iya nenyè zi Pilipo yonzɔ. Mo ayɔlɔ ku nzo a'di ra mo èdì tì'bè zi ko'dɔ.

⁷ Pilipo aya'ba dɔ mo iya henye, “Ayɔlɔ dè henye, akìrì kara kòhi 'ba yehe modɔmowota nje zi kogo mangɔlɔ'bo tisi zi vidi ma kòlò nenyee?”

⁸ Anderiya, öndu 'ba Simona Petero, kòlò tèmì vo lö'böwè, mo ame'do riyè iya henye, ⁹ “Wisi maako èdì kinye, mo èdì mangɔlɔ'bo sisi aba muyi ehe kyenze riyö. Mora a'di ra na laka èdì zi vidi biya nenyee?”

¹⁰ Dakaŋo ayöfu loma aba, ehe Yèsu ayada zi vo lö'bö 'bèniyè zi yada zi vidi biya lima akaŋo. Vidi kora èdì kaa kpulukumuyi mi vidi kayo nenyee. ¹¹ Yèsu oba mangɔlɔ'bo ne mi kala ni i'di öwö'di zi Wirì. Here, mo idra mangɔlɔ'bo ne zi vidiyè, mo o'dɔ kpa here kyenze ne aba, le vidi èdinni mo aba kyɔ zi konyo. ¹² Vidi onyonni biya ma ombanni, ehe Yèsu ayada zi vo lö'bö 'bèniyè zi tɔtɔ kɔsɔ mo ma ɔsɔ, here ma yaŋa dè. ¹³ Vo lö'böwè atɔtɔnni dè zè bi kòlò ehe oso korì 'butè dɔmoriyö wa mati ɔsɔ tèmì mangɔlɔ'bo muyi ne.

¹⁴ Tapèti vidi ongönni kyinë 'ba kö'du korowe ko'dɔ 'ba Yèsu nenyè, ayeto kiyanni henye, “Nenyè atèdì tinyö Nèbì mati èdì zi tayi kinye mi damöku ne.” ¹⁵ Yèsu ayɔlɔ henye zè ombanni yonzɔ zi mo ko'dɔ na wehe zi tedi na yere 'bèzè. Here mo i'bè riyè da doku, ani zi mo tedi kutu ni aba.

Yèsu alasi ta da wini
(Mt 14:22-33; Mk 6:45-52)

¹⁶ Hutaga nani aba vo lö'bö 'ba Yèsu i'bènni akaŋo zi föfö. ¹⁷ Zè èkyinni mi tönbö, ayetonni kumu kyèti zi Kaparanamo. Mati bi öndu Yèsu

gba ayi dē zi zē, ¹⁸ buluku kyigo ēdi ku koho wini na kyenyē. ¹⁹ Mati vo lö'böwē opinni ku kaa wiri wota mandere sowo, zē ongōnni Yēsu lasi ta da wini. Mo asesi nduwē tayi kara ra tōṅbö, zē gbo na tere. ²⁰ Mora mo iya henye, “Ma Yēsu ra! Ere dē!” ²¹ Vo lö'böwē ombanni zi mo koba mi tōṅbö, kandi oko gbo da göti bi mati ēdinni ati'bē zi mo.

Mangolo'bo ma i'di didi

²² Ko'do vere aba vidi mati ēdinni gba ani humirē kapa 'ba föfö, ayolōnni tōṅbö ēdi nje kolō ani. Zē ayolōnni kpa henye, Yēsu i'bē dē mi mo vo lö'bö 'bēniyē eti. Zē i'bēnni kutu nni aba. ²³ Tōṅbö maakowe ta Tiberiyasi i'bēnni kara ta bi mati vidi kayo onyōnni mangolo'bo mati Yere i'di öwö'di. ²⁴ Zē ongōnni henye Yēsu ehe vo lö'bö 'bēni eti i'bēnni ku. Here zē ēkyinni mi tōṅböwē ehe i'bēnni gbo Kaparanamo Yēsu koma. ²⁵ Zē i'janni mo kapa damirē 'ba föfö ehe ako'jōnni ho mo iyanni henye, “Raboni, oko ndala aba kinye?” ²⁶ Yēsu aya'ba do mo iya henye, “Ma yada tinyö zi ye, anze dē ma koma ga kö'du onge kyinē 'ba kö'du korowe, mora ga kö'du onyowe biya wakonyo ma ombe. ²⁷ O'de loo dē kö'du wakonyo mati ēdi rē ni yaṅa ne. O'de loo kö'du wakonyo mati i'di didi ma ṅburu ṅburu ne. Wisi 'ba Vidi aki'di wakonyo nenyē zi ye, ga kö'du Wirī 'Bu i'di kalakonda zi mo ko'do here.”

²⁸ Vidi ako'jōnni ho mo iyanni henye, “A'di ra tinyö Wirī omba ze zi ko'do?” ²⁹ Yēsu aya'ba do mo iya henye, “Wirī omba zi ye tēdi koma aba mi vidi mati mo utu.” ³⁰ Zē aya'banni do mo iyanni henye, “Kyinē 'ba kö'du koro a'diye ra ako'do,

here zi ze to'bo koma mi yi? A'di ra ako'do? ³¹ Go mo yada aba, mati zutu 'bezee edinni mi da lipi, Wiri i'di mana zi ze konyo. O'do re ni kaa mati wayoruwē iyanni henye, 'Wiri i'di mangolo'bo zi ze ta komoriye zi konyo.' ”

³² Yēsu ayada zi ze henye, “Ma yada tinyo zi ye henye, Mosa ra de vidi mati i'di mangolo'bo zi ye ta komoriye. 'Bu ma ra i'di mangolo'bo tinyo ne zi ye ta komoriye. ³³ Ehe mangolo'bo mati Wiri i'di ne edi vidi mati ayi akaŋo ta komoriye zi didi ki'di zi damoku.”

³⁴ Vidi iyanni henye, “Kyedre, i'di zi ze mangolo'bo mati oɔ de nenyē.” ³⁵ Yēsu aya'ba do mo zi ze iya henye, “Ma ra mangolo'bo ma i'di didi. Vidi ma ayi zi ma, atanza de na o'bo. Vidi ma edi koma aba mi ma atanza de na kodro. ³⁶ Ma yada ku nzo zi ye henye, onge ma mora gba anze de koma aba mi ma. ³⁷ Vidi biya mati 'Bu i'di zi ma atayi zi ma. More ma kolō maako temi ze de. ³⁸ Mayi de ta komoriye zi ko'do wa mati momba. Mayi zi ko'do wa mati 'Bu omba ma zi ko'do. Mo utu ma, ³⁹ ehe mo omba zi ko'do tinyo ma kolō temi ze mati mo i'di zi ma ne olu de. Mo omba ma zi kinje ze zi didi mi ndundu 'ba ko'do aba. ⁴⁰ 'Bu ma omba vidi biya mati ongōnni Wisi, zi tedi koma aba mi mo, ehe zi tedi didi ma ŋburu aba. Here ma kinje ze zi didi mi ndundu ko'do aba.”

⁴¹ Vidi ayetōnni he nni wasa ga ko'du Yēsu iya henye, ni ra mangolo'bo mati ayi akaŋo ta komoriye. ⁴² Ze ako'jōnni ha oka ma kolō maako iyanni henye, “Mo anza Yēsu ra de, wisi 'ba

Yosepa? Da yolo ze 'bu mo dë ma mo aba? Hala mo ato'bo kiya henye, naye akaŋo ta komoriyë?”

⁴³ Yësu ayada zi zë iya henye, “Ore ta bi me'do 'be ne! ⁴⁴ Vidi maako o'bo dë tayi zi ma, nje 'Bu mati utu ma ne o'do zë komba zi tayi. Mora ëzë zë ayinni, ma kinjë zë na didi mi ndundu 'ba ko'do aba. ⁴⁵ Kolo temi Nebiyë ayoru henye, ‘Wiri akayandi zë biya.’ Here vidi biya ma owonni da 'Bu ehe ayandi kazi mo atayi zi ma. ⁴⁶ Nje vidi kolo mati ongo 'Bu ne mo ra ayi kazi Wiri. Vidi maako gba ongo 'Bu dë. ⁴⁷ Ma yada zi ye tinyo vidi biya mati edinni koma aba mi mo, edinni didi nburu aba. ⁴⁸ Ma mangolo'bo ma i'di didi! ⁴⁹ Zutu 'be onyonni mana mi da lipi ehe yaa, zë olinni. ⁵⁰ Mora kinye mangolo'bo 'ba komoriyë ne ayi ku akaŋo, here vidi mati mo onyo ku oli dë. ⁵¹ Ma ra mangolo'bo didi mati ayi akaŋo ta komoriyë. Eze vidi mati onyo mangolo'bo nenye, mo akalima nburu. Mangolo'bo mati ma ki'di zi mo ida ra ma ra, medi ki'di zi vidi 'ba damoku nenye zi tedinni na didi.”

⁵² Zë ayetanni he nni wasa oka ma kolo maako aba, ehe ako'jonnii ko'du iyanni henye, “Hala mo ato'bo ki'di ida re ni zi ze konyo?”

⁵³ Yësu aya'ba do mo iya henye, “Ma yada zi ye tinyo, alime dë, nje ezë onyowe ida ehe uwëe yama 'ba Wisi 'ba Vidi. ⁵⁴ Mora ezë onyowe ida ma ehe uwëe yama ma, atediyë didi ma nburu aba, ehe ma kinjëe na didi mi ndundu 'ba ko'do aba. ⁵⁵ Ida ma wakonyo ma tinyo ra, ehe yama ma wakuwë ma tinyo ra. ⁵⁶ Eze onyowe ida ma ehe uwëe yama ma, e kolo ma aba ehe ma kolo

ëti. ⁵⁷ Kaa 'Bu wïdï ra utu ma, ehe mëdï didi aba ga kö'du 'bomo, vïdï biya mati onyonni ida ma akalimanni ga kö'du 'bama. ⁵⁸ Mangolobö mati ayi akaño ta komoriyë anza dë kaa wa mati zutu 'be onyonni. Zë olinni, mora vïdï mati onyo mangolobö nenye akalima nburu.”

⁵⁹ Yësu ëdï kö'du yëti mi bi 'ba mötu mi Kaparanamo mati mo iya kö'du nenye.

Me'do 'ba didi nburu

⁶⁰ Vo lö'bö kayo 'ba Yësu owonni mo ehe iyanni henye, “Kö'du yandi nenye ëdï ndra na kyigo zi vïdï maako yolo. Eyï ra atobö yolo mo?”

⁶¹ Yësu ayolo henye, vo lö'bö 'beniyë ëdinni ame'do na wayawaya. Here mo ako'jo iya henye, “Nenye o'de na riti? ⁶² A'di ra ëzë onge Wisi 'ba Vïdï ëdï ti'bë riyë komoriyë bi mati mo ayi ta 'domo? ⁶³ Lawo mo ra i'di didi. Kyigo 'ba vïdï köndu o'do waako dë. Me'do mati ma me'do zi ye ne, ëdï tëmi Lawo 'ba Wirï ma i'di didi. ⁶⁴ Mora kya e maakowe ombanni dë zi tëdï koma aba mi ma.” Yësu iya nenye, ga kö'du tëmi biyeto aba mo ayolo eyï ra atëdï koma aba mi ni. Mo ayolo kpa eyï ra akasusu ni. ⁶⁵ Yësu iya henye, “Kö'du nenye ra ma yada zi ye obë dë tayi zi ma, nje ëzë 'Bu ra o'de komba zi tayi.”

⁶⁶ Ga kö'du wa mati Yësu iya, vo lö'bö kayo 'bomowe opi gë nni zi mo ehe ononni ta bi lö'bö ga ndi mo. ⁶⁷ Yësu ako'jo ha vo lö'bö 'beni 'butë domoriyö, “E kpa ombe zi kila ma?”

⁶⁸ Simona Petero aya'ba do mo iya henye, “Yere, vïdï maako anza dë ani zi ze tobö ti'bë zi mo. Me'do 'beyi i'di didi nburu. ⁶⁹ Yaanya aba

dēdī koma aba mī yī, ehe da yɔlɔ ku yī ra Wisi Kōlō N̄bala 'ba Wiri.”

⁷⁰ Yēsu ayada zi vo lō'bō 'bēniyē henye, “Ma jeli ye 'butē dōmoriyō, mora ma kōlō tēmī yē dakyikyī.” ⁷¹ Yēsu ēdī me'do kō'du 'ba Yudasi wisi 'ba Simona Sikereto. Mo yaa akasusu Yēsu mo le kōlō tēmī vo lō'bō 'butē dōmoriyō.

7

Yēsu ōndu nī ētī

¹ Tapētī ma nenye, Yēsu ēnyī tī'bē lasi aba mī Galilaya, mo omba dē tī'bē mī Yudiya, ga kō'du Yude ani ombannī zi kofo mo. ² Ku kara zi kadra 'ba karama 'ba mbörögō, ³ ehe ōnduwē 'ba Yēsu iyannī zi mo henye, “Kō'du a'di i'bē dē zi Yudiya? Here vo lō'bō 'bēiyē ato'bōnnī kongɔ wa mati ēdī ako'dɔ. ⁴ Vidī maako o'dɔ waako dē na liwo, ēzē zē ombannī zi maakowe zi yɔlɔ kō'du zē. Here i'dī damōku ma yɔlɔ wa ma ēdī ako'dɔ.” ⁵ Gbī le ōnduwē 'ba Yēsu gba ayinnī dē na vo lō'bō 'bomo.

⁶ Yēsu aya'ba iya henye, “Kadra 'bama gba ayi dē, mora kadra 'be ēdī 'duwī kinye. ⁷ Vidī 'ba damōku nenye ɔ'bōnnī dē e kiyi. Zē iyinnī ma, ga kō'du ma yada nduwē zi zē henye, zē o'dōnnī kō'du kyēnyē. ⁸ I'bēē dagba mī karama. Kadra 'bama gba ɔko dē, ehe mī'bē dē.” ⁹ Yēsu iya nenye ehe alima zɔ mī Galilaya.

Yēsu mī karama 'ba mbörögō

¹⁰ Tapētī ōndu 'ba Yēsu i'bēnnī ku mī karama, mo i'bē liwo kazi yada zi vidī maako. ¹¹ Mī kadra

'ba karama aba, vo dagbe 'ba Yude omanni Yësu ehe ako'jonnî kö'du henye, “Mo ëdî kila?”

¹² Vidi kayo alëpinnî mî ha wasa kö'du mo. Maakowe iyannî henye, “Yësu kora laka ra,” agamowe iyannî henye, “Mo ëdî ndɔndɔ kiga zi vidi biya.” ¹³ Mora vidiyë na tere kazi vo dagba 'bëzë, ehe vidi maako ame'do dë ta da komo vidi kayo kö'du mo.

¹⁴ Mati karama ku kutë zi rë nî kinde, Yësu i'bë mî yëkëlu ayeto wayandi. ¹⁵ Vo dagbe na rakaga ehe iyannî henye, “Hala kora nenye ayɔɔ kö'du takanyi here? Ayandi mo kpa dë.”

¹⁶ Yësu aya'ba dɔ mo iya henye, “Manza dë yandi wa mati ma sösü kö'du mo. Wa mati mëdi ayandi ayi kazi vidi ma utu ma. ¹⁷ Èzë tinyö ombe zi koro Wiri, akayɔle wa mati ma yandi ayi kazi Wiri mandere kazi ma. ¹⁸ Èzë momba zi kika wakoro zi ma, ma kame'do kö'du ma. Mora momba zi koro vidi ma utu ma. Nenyë ra ma yada kö'du tinyö anza dë ndɔndɔ. ¹⁹ Mosa ra dë i'di kö'du ki'di zi ye? Vidi maako tëmî yë oro dë. Here kö'du a'di ombe zi ma kofo?”

²⁰ Vidi kayo aya'bannî dɔ mo iyannî henye, “Yi vo dakyikyî! A'di ra o'dɔ yi zi kö'du sösü henye, vidi maako omba zi kofo yi?”

²¹ Yësu aya'ba dɔ mo iya henye, “Mo'dɔ kö'du koro kölö ehe o'de na rakaga. ²² Mosa i'di kö'du zi ye zi gisi kora 'be n̄bete. Mora tinyö anza Mosa ra dë i'di kö'du ki'di nenye zi ye. Zutu 'be ra. Mî ko'do 'ba ralawo aba ānbeteë gisi kora 'be ²³ zi kö'du ki'di 'ba Mosa koro. Èzë wisi maako atɔ'bo n̄bete mî ko'do 'ba ralawo, kö'du a'di ra e na kamo ma aba ga kö'du vidi maako ko'dɔ na

laka mi ko'do 'ba ralawo? ²⁴ O'de vure de dakyine 'ba ra laya aba. O'de wa mati tinyo ra aba.”

Mo Korisito ra?

²⁵ Kya vidi maakowe ta Yerusalema edi kiyanni henye, “Anza de kora nenye ra ze ombanni zi kofu? ²⁶ Here mo edi gba zo kinye, me'do zi vidi biya kowonni. Ehe vidi maako awasa he nni de mo aba. Here ne ko'du sosu 'be aba vo dagbe ayolanni ku tinyo mo ra Korisito? ²⁷ Mora nani akato'bo tedi hala? Vidi maako ayolo de bi mati Korisito ne atayi ta 'domo, mora da yolo ze bi mati kora nenye ayi ta 'domo.”

²⁸ Mati Yesu edi ko'du yandi mi yekelu, mo agbogbo he ni iya henye, “Tinyo asosuwé ayole ma ku, ehe ta kila mayi ta 'domo? Mayi de na bi da ma! Vidi mati utu ma edi tinyo, ehe ayole mo de. ²⁹ Mora ma yolo vidi mati utu ma, ga ko'du mayi kazi mo.”

³⁰ Kya vidi maakowe ombanni zi Yesu kiri, mora du vidi maako i'di kala ni de do mo, ga ko'du kadra 'bomo gba oko de. ³¹ Mora vidi kayo mi kute vidi nee i'dinni koma 'beni mi mo ehe iyanni henye, “Eze Korisito ne ayi, mo ako'do kyine 'ba ko'du korowe ndra ta da kora nenye?”

Utu vo kanye 'ba yekelu zi Yesu kiri

³² Mati Farasiye owonni vidi kayo edinni he nni wasa ga ko'du 'ba Yesu, ze ehe kyedree 'ba vo karase utunni vo kanye 'ba yekelu zi mo kiri.

³³ Mora Yesu ayada zi ze iya henye, “Ma tedi eti tisi na konda, ehe ma ta'ba zi vidi mati utu ma ne.

³⁴ Akome ma, mora du aki'je ma de. O'be de ti'be bi mati mede ti'be 'domo.” ³⁵ Vidi ako'jonn ha

oka ma kölö maako henye, “Kila mo ato'bo ti'bë zi sesi ze ta bi ni ki'ja? Mo ëdi ti'bë mi dakaŋo mënzë maakowe mati vidi 'bezee ëdinni alima? Mo ëdi ti'bë ani zi vidiyë 'ba Girigi yandi? ³⁶ A'di ra mi me'do 'bomo mati mo iya henye, da koma ze ni mora di'ja ni dë? Kö'du a'di da to'bo dë ti'bë bi mati mo ëdi ti'bë?”

Lili 'ba wini ma i'di didi

³⁷ Mi ndundu mo ehe mi ko'do kyedre 'ba karama, Yësu ɔɔ riyë ehe agbögbö hë ni iya henye, “Ëzë ëdiyë kodro aba, ayiye zi ma ehe uwëë! ³⁸ Ëdiyë koma aba mi ma, atëdiyë wini ma i'di didi, taho tëmi yöndu 'ba mi yë, kaa wayöruwë iyanni henye.” ³⁹ Yësu ëdi ame'do kö'du 'ba Lawo Laka, mati aki'di zi vidi biya mati ëdinni koma aba mi mo. Lawo ne gba i'di dë zi vidi kölö maako, kyere Yësu gba i'di bikanyi kyedre 'bëni dë ndo.

Rakinye mi kutë vidi

⁴⁰ Mati vidi kayo owonni Yësu iyanni nenyë, kya maakowe iyanni henye, “Mo atëdi Nëbi ra.” ⁴¹ Agamowe iyanni henye, “Mo Korisito ra.” Agamowe iyanni kpa henye, “Korisito ne ato'bo tayi ta Galilaya? ⁴² Wayöruwë iyanni henye, Korisito atayi tëmi dakota 'ba Yere Dawidi. Here kö'du nenyë go mo ya'ba aba, ako'jo mo mi Beteleme, mi gawo mati Dawidi alima 'domo?” ⁴³ Vidi ayetonni me'do ra oka ma kölö maako ga kö'du 'ba Yësu. ⁴⁴ Kya zë maakowe ombanni zi mo kiri, mora du vidi maako i'di kala ni dë do mo.

Vo dagbe ombanni dë zi tedi koma aba mi Yësu

⁴⁵ Mati vo kanye 'ba yèkèlu a'bannì zi kyedree 'ba vo karase ehe Farasiye, ako'jo hē zē henye, “Kö'du a'di ike Yēsu dē kinye?” ⁴⁶ Zē aya'bannì henye, “Vidì maako gba ame'do dē kaa kora nenye.” ⁴⁷ Farasiye iyannì zi zē henye, “Mo o'do lumē kpa ku re? ⁴⁸ Ma kōlō tēmì kyedree 'ba vo karase mandere Farasiye ēdì koma aba mī mo? ⁴⁹ Ehe vidì nenyee mati ayɔɔnnì kö'du kī'dī dē, zē hu wasēnē 'ba Wīrī.” ⁵⁰ Nikodīmō mati i'bē zi Yēsu dagba, ehe mo kōlō tēmì vo dagbe 'ba Yude, iya henye, ehe mo ra kpa kyere ayi zi Yēsu kongɔ. Mo iya henye, ⁵¹ “Kö'du kī'dī 'beze ila ze dē zi riti kī'dī zi vidì gba kazi ze kowo wa ma zē ombannì kiya. Dɔ'bo dē vurē 'bēzē ko'do gba kazi ze yolo a'di ra zē o'dōnnì.”

⁵² Zē iyannì henye, “Nikodīmō, yī tēmì Galilaya? Ako'jo wayōru nee, ehe aki'ja henye, nēbī ako anza dē zi tayi ta Galilaya.” ⁵³ Vidì biya i'bēnnì gbo liɔ 'bēnnì na kutu kutu.

8

*Mbara ɪrī ta bi ndoro ko'do**

¹ Mora Yēsu i'bē yaga zi Dōku 'ba Olivo. ² Damīndō vere aba ɲɔ mo i'bē zi yèkèlu. Vidì ayinnì zi mo, mo alima akaɲo ehe ayeto zē yandi. ³ Vo komoyandiye 'ba kö'du kī'dī ehe Farasiye ikannì loko mbara maako ɪrī ta bi ndoro ko'do, ehe zē o'dōnnì mo atɔɔ komo nnì biya. ⁴ Here zē iyannì henye, “Raboni, mbara nenye ɪrī ēdì ko'do kora maako aba anza o'di 'bomo ra dē. ⁵ Kö'du kī'dī 'ba Mosa ayandi henye, mbara kaa

* **8:** Komo nenyē anza dē mī dagba wayōru 'ba Bayibolo.

ma nentye zi ku'du brua yitö aba. A'di ra iya?"
 6 Zë ako'jonnî ha Yësu, kö'du ko'jo nentye aba, ga kö'du zë ombannî mo susu ehe zi kö'du kyënyë maako kika rɔ mo. Mora Yësu idë rë nî ayeto wayöru dakaño dawisi kala nî aba.

7 Zë asesinnî zɔ nduwë hɔ mo ko'jo kö'du 'ba mbara ne. Ndundu mo aba mo ɔɔ riyë iya henye, "Ëzë vidî maako tēmî yë o'dɔ kö'du kyënyë dë mu'du dagba yitö dɔ mo." 8 Mo idë rë nî kpa löhu ayeto wayöru dakaño. 9 Vidî nee i'bënnî biya na kölö kölö, ayeto ma tendro mo aba. Ndundu mo aba Yësu mbara ne aba ɔsonnî kutu nni aba. 10 Yësu ɔɔ riyë ako'jo hɔ mo iya henye, "Vidî nee biya kila? Vidî maako anza kpe zi yî susu?"

11 Mbara ne aya'ba dɔ mo iya henye, "Ee Kyedre, vidî maako anza dë." Yësu ayada zi mo iya henye, "Manza dë kpa ti'bë zi yî susu. I'bë yaanya aba, o'dɔ kö'du kyënyë dekpe."

Yësu bikanyi kö'du damöku

12 Kpa löhu Yësu ame'do zi vidiyë. Kadra nentye aba mo iya henye, "Ma ra bikanyi kö'du damöku. Usu ga ma, ehe alasi dë mi biköndu. Akatëdi bikanyi ma aki'di didi aba."

13 Farasiye iyannî zi mo henye, "Yi ra nje vidî ma ëdi ame'do kö'du yî, ehe anza dë tînyö na laka zi yî ra tedi akpa na vo kiya 'beyi."

14 Yësu aya'ba dɔ mo iya henye, "Here ëzë ma me'do le kö'du ma, wa ma miya ëdi tînyö. Ma yolo ku mayi ta kila ehe mëdi ti'bë kila. Mora ayole dë ma ta kila mandere mëdi ti'bë kila.

15 O'de vurë tēmî gëri kölö mati vidî biya o'donnî,

mora mo'do vurë 'ba vidi maako dë. ¹⁶ Èzë mo'do vurë, ma ko'do na laka, ga kö'du ma ko'do dë kutu ma aba. 'Bu mati utu ma ne ëdi kinye ma aba. ¹⁷ Kö'du ki'di 'be omba vo kiya riyö zi yada kö'du ne ëdi tinyö. ¹⁸ Ma kölö tëmï vo kiya 'bame, ehe 'Bu mati utu ma ëdi agamo maako.”

¹⁹ Zë ako'jonnï ho mo iyanni henye, “Bu yi ëdi kila?” Yësu aya'ba do mo iya henye, “Ayole ma dë mandere 'Bu ma. Èzë ayole ma, akayole 'Bu ma.”

²⁰ Yësu iya nenyë mati mo ëdi gba kö'du yandi mi bi ma söndu 'ba waki'di 'ba yëkëlu asesi 'domo. Mora vidi maako iri mo dë ga kö'du kadra 'bomo gba ayi dë.

J'be dë ti'bë bi mati mëdi ti'bë

²¹ Yësu ayada kpa zi vo dagbe 'ba yëni henye, “Mëdi ti'bë 'de akome ma, mora j'be dë ti'bë bi mati mëdi ati'bë, akoliye kö'du kyënyë 'be kazi wakila.”

²² Vidi ako'jonnï kö'du iyanni henye, “Mo omba zi rë ni kofo? Èdi nani wa ma mo iya henye, do'bo dë ti'bë bi mati mo ëdi ti'bë?”

²³ Yësu aya'ba do mo iya henye, “Èdiyë ta lebi, mora ma ta riyë. E 'ba damöku nenyë, mora manza dë 'ba damöku nenyë. ²⁴ Kö'du nenyë ra miya akoliye kö'du kyënyë 'be aba. Èzë anze dë koma aba mi ma, kö'du eyi mëdi, akoliye mi kö'du kyënyë 'be ila dë.”

²⁵ Zë ako'jonnï ha Yësu iyanni henye, “Yi 'bëyi eyi?” Yësu aya'ba do mo iya henye, “Ma ra te mati ma yada zi ye biyeto aba. ²⁶ Ani kö'du ëdi kyö ma to'bo kiya zi yada henye o'de kö'du kyënyë, mora vidi mati utu ma ëdi tinyö, ehe

ma yada zi vidi 'ba damöku nenyé nje wa mati mowo kazi mo.”

²⁷ Vidi maako ayolo dö Yësu ëdi ame'do zi zë kö'du 'Bu nî. ²⁸ Yësu i'bë nduwë kiya mo aba henye, “Ëzë umbëë Wisi 'ba Vidi ku riyë, akayole ëyi ra ma. Akayole kpa henye manza dö wa maako ko'do na bi da ma. Miya nje wa mati 'Bu ma ayandi zi ma. ²⁹ Mo mati utu ma ëdi ma aba. 'Duwi mo'do wa mati o'do mo na rakyenyi ehe mo ila ma dö.”

³⁰ Tapëti Yësu iya nenyé, vidi kayo omani mi mo.

Kö'du tinyö akinga yi na dangölö

³¹ Yësu ayada zi vidi mati ëdinni koma aba mi nî henye, “Ëzë asesiye nduwë koro wa mati miya, e tinyö vo lö'bo 'bama ra. ³² Akayole kö'du tinyö, ehe kö'du tinyö akinge na dangölö.”

³³ Zë aya'banni do mo iyanni henye, “Ze gisi 'ba Abarayama! Danza dö gba na vo kalima 'ba vidi maako. Hala ato'bo kiya akinga ze na dangölö?”

³⁴ Yësu aya'ba do mo iya henye, “Ma yada tinyö zi ye, vidi ma o'do kö'du kyënyë ëdi vo kalima 'ba kö'du kyënyë. ³⁵ Vo kalime, alimanni dö nburu mi dakota, ëzë wisi alese le 'duwi mi dakota. ³⁶ Ëzë Wisi i'di zi ye dangölö, tinyö aba e na dangölö. ³⁷ Ma yolo ku, e temi dakota 'ba Abarayama, mora ombe zi ma kofo, ga kö'du, kö'du kise 'bama anza dö tinyö mi di'di ye. ³⁸ Mëdi ame'do kö'du wa mati 'Bu ma ayada zi ma, te kaa mati ëdiyë ako'do wa mati 'bu wë ayandi zi ye.”

³⁹ Vidi iyanni zi Yësu henye, “Abarayama ra 'bu ze!” Yësu aya'ba do mo iya henye, “Ëzë e gisi 'ba Abarayama, o'de wa mati Abarayama o'do. ⁴⁰ Tapëti mo ombe zi ma kofo ta bi kö'du tinyö yada zi ye mati Wirï i'di zi ma. Abarayama o'do waako dë kaa ma nani. ⁴¹ Mora ëdi ko'de te wa mati 'bu wë o'do.” Zë iyanni henye, “Asusu ze dë zi kiya dëdi kpa 'bu maako aba. Dëdi nje 'bu aba kölö, mo ra Wirï.”

⁴² Yësu iya zi zë henye, “Ëzë Wirï ra 'Bu wë, owe ma, ga kö'du mayi kazi Wirï yaanya aba mëdi kinye. Mo ra utu ma. Mayi dë na bi da ma. ⁴³ Kö'du a'di ra ayole kö'du mati mëdi ame'do kö'du mo dë? J'be dë tɔɔ zi kowo kö'du mati mëdi akiya? ⁴⁴ 'Bu wë ra Satani, ehe o'de te wa mati mo omba. Mo 'duwi vo wakofe ehe vo ndondo. Kö'du tinyö ako anza dë kö'du mo. Mo ame'do kö'du ni, ehe kö'du biya mati mo iya ndondo ra. Anza dë nje mo ra na vo ndondo, mora mo kpa 'bu 'ba vo ndonde biya. ⁴⁵ Ga kö'du ma yada zi ye kö'du tinyö, e ombe dë zi tedi koma aba mi ma. ⁴⁶ Vidi maako temi ye ato'bo ma susu ga kö'du kyenyë ko'do? Ëzë ma yada kö'du tinyö, kö'du a'di ra ome dë mi ma? ⁴⁷ Vidi mati 'ba Wirï akoze mbili ni da kö'du kise 'bomo, mora ombe dë zi kowo, ga kö'du anze dë 'ba Wirï.”

Yësu ehe Abarayama

⁴⁸ Yude aya'banni zi Yësu henye, “Dëdi ze tinyö aba zi kiya henye, yi vidi 'ba Samariya ra, ehe ëdi dakyikyaba mi yi?”

⁴⁹ Yësu aya'ba dɔ mo iya henye, “Manza dë dakyikyɪ aba mī ma. Moro 'Bu ma, ehe ombe dë zi koro ma. ⁵⁰ Momba wakoro dë ga kō'du ma, mora vīdī maako ēdī ani omba zi ma tēdī na wakoro, ehe mo ra kpa 'ba vurë ko'dɔ. ⁵¹ Ma yada tīnyō zi ye henye, ēzë orowe me'do 'bama du akoliye dë.”

⁵² Vīdī iyannī henye, “Yaanya aba tīnyō da yɔɔ ku ēdī dakyikyɪ aba. Abarayama oli ehe nēbīyē kpa. Hala ɔ'bo kiya henye, vīdī mati oro me'do 'bēyī oli dē? ⁵³ Yī kyedre ta da 'bu ze Abarayama? Mo oli ehe nēbīyē kpa. Ēyī ra asōsu 'bēyī yī?”

⁵⁴ Yësu aya'ba dɔ mo iya henye, “Ēzë moro ra ma, o'dɔ waako dë. 'Bu ma ra vīdī ma oro ma. Iye henye mo Wīrī 'be ra. ⁵⁵ Gbī le tīnyō ayole mo dë, mora ma yɔɔ mo. Ēzë miya ma yɔɔ mo dë, ma tēdī na vo ndɔndɔ kpa kaa e biya. Mora ma yɔɔ mo, ehe mo'dɔ wa mati mo iya. ⁵⁶ 'Bu wë Abarayama ēdī rakyenyi aba zi kongɔ kadra tayi 'bama, mo ongo ma ehe ēdī na rakyenyi.”

⁵⁷ Zë iyannī henye, “Anza kpa dë kɔɔ 'butēmuyī aba. Hala ɔ'bo kongɔ Abarayama?”

⁵⁸ Yësu aya'ba dɔ mo iya henye, “Ma yada tīnyō zi ye, gba Abarayama anza dë, mēdī.” ⁵⁹ Vīdī obannī yītō riyē zi Yësu kofɔ, mora mo oho rē nī ehe ila yēkēlu.

9

Yësu ako'jo kora maako o'jo na komoköndu

¹ Mati Yësu alasi na konda, mo ongo kora maako na komoköndu kyere mati o'jo. ² Vo lö'böwë 'ba Yësu ako'jonnī henye, “Raboni, kō'du

a'di ra kora nenyē o'jo na komoköndu? Ēdī ga kö'du mo, mandere vo ko'jo mowe o'dönni kö'du kyenyē?”

³ Yēsu aya'ba dō mo iya henye, “E e, anza here dē. Mora ga kö'du komoköndu 'bōmo, akonge Wiri ako'dō kö'du koro zi mo. ⁴ Ēzē ēdī kadra, do'de wa mati vidi ma utu ma omba ma zi ko'dō. Ēzē yōndō ɔko ku, vidi maako ɔ'bo dē zi loo ko'dō. ⁵ Mati mēdi mi damöku, ma bikanyi ra zi damöku.”

⁶ Tapēti Yēsu iya nenyē, mo o'bi oro dakaŋo. Mo o'dō koro ehe ora komo kora ne. ⁷ Here mo iya henye, “I'bē akaka koro ne mi Kara Siliyōma.” Kora ne i'bē ehe akaka mi Siliyōma. Kö'du ya'ba aba, “Vidi ma utu, akutu.” Mati mo akaka koro ne ku yaga mo ɔ'bo bi kongō.

⁸ Vo haliŋo oka 'bōmowe, ehe vidi mati ongönni mo ta bi lenze kyere ne, ako'jonnī kö'du henye, “Nenyē anza dē kora mati ēdī alima akaŋo ehe 'duwi alenze?”

⁹ Kya zē maakowe iyanni henye, mo ra gbī te kora vo lenze ne, agamowe iyanni henye, mo andele nje kaa mo. Mora mo ayada zi zē, “Ma kora nani ra.” ¹⁰ Zē ako'jonnī ho mo henye, “Hala ɔ'bo bi kongō?” ¹¹ Mo aya'ba dō mo iya henye, “Vidi maako ru mo Yēsu o'dō koro ehe ora komo ma. Mo ayada zi ma ti'bē kaka mi Kara Siliyōma. Mati mo'dō, mo'bo bi kongō.” ¹² Zē ako'jonnī kö'du henye, “Mo ēdī kila yaanya aba?” Mo aya'ba dō mo iya henye, “Ma yolo dē.”

Farasiye ayonzönni zi ki'ja a'di ra o'do rē ni

13-14 Ko'do mati Yësu o'do koro ne ehe ako'jo kora ne, mi ko'do 'ba ralawo. Here vidi obanni kora ne zi Farasiye. 15 Zë ako'jonnî ho mo hala mo o'bo zi bi kongɔ, ehe mo aya'ba henye, “Yësu o'do koro ehe ora komo ma. Tapëti ma kaka, mo'bo bi kongɔ.”

16 Kya 'ba Farasi maakowe iyanni henye, “Kora nenye Yësu ayi dë kazi Wirî. Èzë mo o'do here, mo o'bo dë kowe kö'du ki'di 'ba ko'do madomoriyö.” Agamowe ako'jonnî henye, “Hala vidi 'ba kö'du kyënyë ato'bo ko'do kyinë 'ba kö'du korowe?” Here Farasiye o'bonnî dë kö'du kida tēmî kutë nnî, 17 zë ako'jonnî ha kora ne iyanni henye, “A'di ra iya, kö'du vidi mati ako'jo komo yi ne?” Kora ne ayada zi zë iya henye, “Mo nēbî ra.”

18 Mora vo dagbe 'ba Farasiye omannî dë henye, kyere kora ne ëdî na vo komoköndu. Zë utunnî litu zi vo ko'jo mowe, 19 ehe ako'jonnî hë zë henye, “Nenye wisi mati iye henye, o'jo na komoköndu? Hala mo o'bo bi kongɔ yaanya aba?”

20 Vo ko'jo 'ba kora ne aya'bannî do mo henye, “Da yolo ku tinyö mo wisi 'beze ra, ehe da yolo ku o'jo mo na komoköndu. 21 Mora da yolo dë hala mo i'ja komo ni mandere eyi ra i'di komo zi mo. Ako'jowe ho mo! Mo övu ku kyedre zi me'do ga kö'du ni.” 22-23 Vo ko'jo 'ba kora nenye iyanni here, ga kö'du zë erennî Yude. Vo dagbe 'ba Yude idannî kö'du ku nzo henye, vidi maako manza dë wa maako aba zi ko'do zi vidi maako mati mo iya Yësu ra Korisito ne.

24 Vo dagbe ako'jonnī kora ne hulēhu iyannī henye, “İ'dī wayeto zi Wirī! Da yolo ku Yēsu vo kö'du kyēnyē ko'do.”

25 Kora ne aya'ba henye, “Ma yolo dē, ēzē mo vo kö'du kyēnyē mandere anza dē. Biya ma yolo henye, ma kyere vo komoköndu, mora yaanya aba mo'bo bi kongo.”

26 Zē ako'jonnī ho mo henye, “A'di ra mo o'do zi yī? Hala mo ako'jo komo yī?”

27 Kora ne aya'ba do mo iya henye, “Ma yada ku zi ye da kölō, ehe ombe dē zi kowo. Kö'du a'di ra ombe zi ma yada zi ye löhu? Ombe kpa zi tayi na vo lö'bo 'bomowe?”

28 Vo dagbe alidinnī kora ne, ehe iyannī henye, “Yī vo lö'bo 'bomo! Ze vo lö'bo 'ba Mosa. 29 Tīnyō da yolo Wirī ame'do zi Mosa, mora du da yolo dē Yēsu ayi ta kila.”

30 Kora ne aya'ba da me'do iya henye, “Kö'du koro a'di ra here! Mo ako'jo komo ma, ehe gba ayole dē mo ayi ta kila. 31 Da yolo ku henye, Wirī owo nje me'do 'ba vidi mati owonni ehe oronni mo. Wirī owo me'do 'ba vo kö'du kyēnyē ko'de dē. 32 Ehe nenye edi dagba kadra mi vurē, vidi maako i'di komo zi vidi maako o'jo na komoköndu. 33 Yēsu o'bo dē zi wa maako ko'do, nje ēzē mo ayi kazi Wirī.”

34 Vo dagbe ayadanni zi kora ne henye, “Yi na vo kö'du kyēnyē ko'do kyere mi kadra mati o'jo yi. Asosu 'beyi ato'bo yandi ze wa maako aba?” Here zē iyannī henye, “O'bo dekpe tayi hulēhu mi bi 'ba motu 'beze kölō maako!”

Komoköndu zi Lawo Laka

³⁵ Mati Yësu owo kö'du mati o'do rë nï ne, mo i'bë i'ja kora ne. Yësu ako'jo ho mo iya henye, “Èdì koma aba mï Wisi 'ba Vidi?”

³⁶ Mo aya'ba do mo iya henye, “Kyedre, ezë ayada zi ma mo eyi ra, ma ki'di koma 'bama mi mo.” ³⁷ Yësu aya'ba henye, “Ongo mo ku nzo, ehe yaanya aba mo edi me'do yi aba.” ³⁸ Kora ne iya henye, “Yere, mi'di koma 'bama mi yi.” Here mo amötu Yësu gbo. ³⁹ Yësu ayada zi mo, “Mayi mi damöku nenyë, zi vurë 'ba vidiyë ko'do. Ma kinye zi ki'di komo zi vo komokönduwë ehe zi ko'do vidi vo komoköndu biya mati ato'bo bi kongo.”

⁴⁰ Mati Farasiye owonni Yësu iya nenyë, zë ako'jonnï henye, “Ze vo komoköndu?”

⁴¹ Yësu aya'ba do mo iya henye, “Èzë ediyë na vo komoköndu, atanze dë mi kö'du kyenyë. Mora yaanya ezë aba iye zi bi kongo, akasesiye kö'du kyenyë nduwë.”

10

Komo 'ba vo timelë yako

¹ Yësu iya henye, “Ma yada tinyö zi ye, nje vo logo ehe vo wakolo ekyi ta da resi. Zë ödunnï dë kpuru ta haresi zi jolo 'ba timelë. ² Vidi mati ödu kpuru ta haresi, mo ra vo yako 'ba timelë. ³ Mora vo ga haresi kongo ayëhu haresi zi vo yako timelë, ehe timelë ayolonnï gu vo yako 'benni. Mo ako'jo timelë 'beni ru zë aba, ehe alaga dagba zi zë yaga. ⁴ Mati mo ayasi timelë 'beni nee ku biya yaga, mo i'bë dagba da komo zë, ehe zë usunnï go mo, ga kö'du zë ayolonnï

gu mo. ⁵ Tímèlè usu ga vo leze maakowe dè. Zè ayɔlonni gu vo leze dè, ehe zè ahonni 'de.” ⁶ Yèsu ayada komo nenye zi vidiyè, mora zè ayɔlonni dè a'di ra mo èdì ame'do kò'du mo.

Yèsu vo tímèlè yako laka ra

⁷ Here Yèsu iya löhu, “Ma yada tinyö zi ye henye, ma haresi zi tímèlè. ⁸ Vidi mati ayi dagba ta komo ma, vo logo ra mandere vo wakolo, ehe tímèlè owo da ma kolo tème zè ne dè. ⁹ Ma haresi ra. Zè biya mati ayinni kpuru ta da ma, akayomo. Zè atayinni, ati'bènni, ehe aki'janni loma. ¹⁰ Vo logo ayi nje zi kolo, kofo, ehe yaña. Mayi zi vidi biya tedinni didi aba, ehe zi tedinni mo aba ndo.

¹¹ “Ma vo tímèlè yako laka ra. Vo tímèlè yako laka i'di didi ni kò'du tímèlè 'bèni. ¹² Vo loo ko'do anzanni dè kaa vo tímèlè yako mati tímèlè na 'bomo. Èzè onganni wöliwöli atayi, zè aho wènni ilanni tímèlè. Here wöliwöli iri ehe apere tímèlè nee. ¹³ Vo loo ko'do aho wènni 'de ga kò'du zè asosunni kò'du 'ba tímèlè nee dè.

¹⁴ “Ma vo tímèlè yako laka ra. Ma yolo tímèlè ame, ehe zè ayɔlonni ma, ¹⁵ kpa kaa 'Bu ayolo ma, ma yolo 'Bu, ehe mi'di didi ma kò'du tímèlè ama. ¹⁶ Mèdi tímèlè maako eti anzanni dè tème jolo 'ba tímèlè nenye. Ma kika zè kpa ga bi kolo, ehe zè akowonni gu ma. Here atedinni goli kolo 'ba tímèlè ehe vo yako kolo.

¹⁷ “Bu owo ma ga kò'du mi'di didi ma, here ma kiri hulèhu löhu. ¹⁸ Vidi maako oba didi ma dè kazi ma. Ma ra mi'di mi kò'du komba 'bama. Mèdi kyigo aba zi ki'di, ehe kyigo aba zi kiri hulèhu löhu, kaa mati 'Bu ma i'di kò'du mo zi ma zi ko'do.”

19 Mati zë owonnî me'do 'ba Yësu ne, Yude inye mî nnî. 20 Maakowe kyɔ tēmî zë iyannî henye, “Mo ëdî dakyikyî aba mî nî. Mo vo lökyî ra. Kö'du a'di zi mbili koze zi mo?” 21 Mora agamowe iyannî henye, “Hala vidî mati dakyikyî aba mî nî ato'bo kiya kö'du nenyee? Vidî maako anza dë kaa nenyee zi to'bo vo komokönduwë kî'dî zi bi kongɔ?”

Vidî ombannî Yësu dë

22 Mî tona nani, Yësu ëdî mî Yerusalema kö'du karama 'ba yëkëlu. 23 Kadra maako aba, mo ëdî alasi mî kapa 'ba yëkëlu sënjë 'ba Solomono 24 ehe Yude atoto rë nnî toko ro mo. Zë iyannî henye, “Hala na konda omba ti'bë ze sesi kö'du sösu aba? Èzë yî Korisito ra, ayada zi ze huwë.”

25 Yësu aya'ba do mo iya henye, “Ma yada zi ye, ehe ombe dë zi koma kö'du 'bama. Wa mati mo'do kalakonda 'ba 'Bu ma aba, ayada ëyî ra ma. 26 Mora kyere anze dë timëlë ama, ome kö'du 'bama dë. 27 Timëlë ama owonnî gu ma, ehe ma yolo zë. Zë usunnî ga ma. 28 Mî'dî didî ma nburu zi zë, here kazi zë ölunnî. Vidî maako akoba zë dë yaga ta kala ma. 29 'Bu ma i'dî zë zi ma, ehe mo kyedre ta da agamowe biya. Vidî maako o'bo dë zë koba ta kala mo 30 Ma kölö 'Bu aba.”

31 Kpa löhu vo dagbe 'ba Yude obannî yitö kö'du zi Yësu kofo. 32 Mora mo iya henye, “Ma yada wa laka kyɔ zi ye mati 'Bu ma utu ma zi ko'do. Ma vala ra ombe ma ku'du go mo yitö aba?”

33 Zë aya'bannî do mo iyannî henye, “Danza dë yî ku'du yitö aba ga kö'du wa laka mati o'do.

Dëdi yī ku'du yītō aba ga kō'du alidi Wirī. Yī ōṅbō vīdī ra, ehe kinye ēdī akiya zi tēdī na Wirī.”

³⁴ Yēsu aya'ba dō mo iya henye, “Mī wayōru 'be, Wirī iya dē henye, ‘E wirī mbiya ra?’ ³⁵ Ǿ'be dē he wasa wayōru aba, mati mī mo Wirī ame'do zi vīdī naniye ehe ako'jo zē wirī. ³⁶ Here kō'du a'di asusuwē ma lidi Wirī ga kō'du miya henye ma Wisi 'ba Wirī? Tapēti mo biya, ēdī 'Bu ra ako'jo ma kō'du lōō nenyē. Mo ra kpa vīdī mati utu ma mī damōku. ³⁷ Ēzē manza dē ako'do wa mati 'Bu ma omba ma zi ko'do, neene ome dē mī ma. ³⁸ Mora ēzē mo'do wa mati 'Bu ma o'do, akome ga kō'du nani, gbī le ēzē anze dē koma aba mī ma. Neene akayōle tīnyō henye, 'Bu ēdī kōlō ma aba, ehe ma kōlō 'Bu aba.”

³⁹ Lōhu zē ombānī zi Yēsu kīrī. Yēsu anza dē hu kyigō 'bēzē. Ī'bē yaga ta kala zē. ⁴⁰ Mo umu kyētī Ranga Yeredene bi mati Yowani ēdī kyere bapatisi kī'dī. Mati Yēsu ēdī ani, ⁴¹ vīdī kayo ayinnī zi mo. Zē ēdinnī akiya henye, “Yowani o'do kyīnē 'ba kō'du koro maakowe dē, mora kō'du biya mati mo iya kō'du 'ba Yēsu ēdī tīnyō.” ⁴² Vīdī kayo naniye ī'dī koma 'bēnnī kpa mī Yēsu.

11

Koli 'ba Lazara

¹ Kora maako ru mo Lazara alēpī na kōō mī gawo 'ba Beteniya. Mo ēdī ēmī aba rīyō, Mariya ehe Marita. ² Nenyē kpa te Mariya mati yaa ope yēningutru da Yere ehe akyitō burutu mo yēvu 'bēnī aba. ³ Ēmīyē utunnī kō'du kise zi Yēsu ehe ayadannī zi mo aboka laka 'bōmo Lazara ēdī na rakōō.

⁴ Mati Yësu owo kö'du nenyë iya henye, “Koo 'bomo ne ndundu mo anza dë koli, mora ëdi zi kika wayeto zi Wirī ehe Wisi omo.”

⁵ Yësu owo Marita, ëmī mo ehe Lazara. ⁶ Here mati mo owo mo ëdi na koo alima bi mati mo ëdi 'domo ko'do riyö aba löhu. ⁷ Neene mo iya zi vo lö'bö 'bëniyë henye, “Yaanya aba di'bëe hulëhu Yudiya.”

⁸ Zë iyanni henye, “Raboni, vidi naniye ombanni zi ku'du yi yitö aba brua! Kö'du a'di omba zi ti'bëe hulëhu?”

⁹ Yësu aya'ba henye, “Kadra anza dë 'butë domoriyö mi ko'do kölö? Ezë alasi mi kadra, bikanyi 'bëyi atëdi kazi kadra ehe otra ndi yi dë. ¹⁰ Mora ezë alasi yondo aba, akotra ndi yë ga kö'du anza dë bikanyi maako aba.” ¹¹ Neene mo ayada zi zë henye, “Aboka ze Lazara ëdi ako'do, ehe mëdi ti'bëe ani zi mo liro.”

¹² Zë aya'banni henye, “Yere ezë mo ëdi ako'do, mo atënyi na laka.”

¹³ Yësu ëdi ame'do tinyö kö'du koli 'ba Lazara, mora vo lö'böwë asösu 'bënni mo ëdi nje ame'do kö'du 'ba ko'do. ¹⁴ Here Yësu ayada zi zë huwë, “Lazara oli ku. ¹⁵ Ma rakyenyi aba manza dë ani, ga kö'du yaanya aba atëdiyë donö aba zi ki'di koma 'be mi ma. Di'bëe zi mo.”

¹⁶ Toma mati ru rezë 'bomo ëdi “Loña” iya zi vo lö'bö agamowe henye, “Ayiye di'bëe, here da to'bo koli mo aba.”

Yësu injë Lazara na didi

¹⁷ Mati Yësu oko Beteniya, mo i'ja Lazara ëdi ku nzo mi dawogo ko'do sowo aba. ¹⁸ Beteniya ëdi tisiwa aba ta da wiri wota ta Yerusalema, ¹⁹ ehe

Yuda kayo ayinnī ta gawo kyedre zi da Marita ehe Mariya lēlu ga kō'du öndu zē oli ku.

²⁰ Mati Marita owo henye Yēsu ɔkɔ ku, mo i'bē yaga zi dɔ mo kutrē, mora Mariya alima 'bēnī loko. ²¹ Marita iya zi Yēsu henye, “Yere, ezē yī ēdī kinye, öndu ma oli dē. ²² Gbī le yaanya aba ne ma yɔɔ ku henye Wiri ako'do wa mati ako'jo.”

²³ Yēsu ayada zi mo iya henye, “Öndu yī akadidī löhu.” ²⁴ Marita aya'ba dɔ mo iya henye, “Ma yɔɔ ku mo atēnyī na didī mī ndundu ko'do aba, ezē biya yöku ēnyī ku.” ²⁵ Yēsu iya zi Marita henye, “Ma ra vidī mati ēdī yöku kīnjē zi didī. Vidī biya mati omannī mī ma akadidinnī, ezē olinnī le. ²⁶ Ehe vidī biya mati alimannī ga kō'du 'ba koma mī ma tīnyö akolinnī dē. Oma nenyē ku?”

²⁷ Mo alēzē iya henye, “Ɔɔ Yere, moma yī Korisito ra, Wisi 'ba Wiri. Yī ra vidī mati da sösu kō'du mo atayi mī damöku ne.”

Yēsu udu

²⁸ Tapētī Marita iya nenyē, mo i'bē liwo iya zi emī nī Mariya, “Raboni ēdī kinye, ehe mo omba zi yī kongɔ.” ²⁹ Kandi mati Mariya owo nenyē, mo ēnyī riyē i'bē yaga zi Yēsu. ³⁰ Mo gba yaga ta ra gawo bi mati Marita i'bē dɔ mo kutrē. ³¹ Vidī kayo ayinnī zi da Mariya lēlu, ehe mati kandi zē ongɔnnī mo ila loko, asösunni mo ēdī ti'bē dawogo zi kudu. Here zē alö'bönnī gbɔ ga ndī mo.

³² Mariya i'bē bi mati Yēsu 'domo. Kandi mati mo ongɔ mo, alomvɔ burutu mo iya henye, “Yere, ēdī kyere kinye, öndu ma oli dē.”

³³ Mati Yësu ongo Mariya ehe vidi mati mo aba edinni akudu, mo kö'du sösu aba ³⁴ Ako'jo henye, “Kila i'di ye ida ro mo?” Zë aya'banni henye, “Yere, ayi ongo te.”

³⁵ Yësu ayeto kudu. ³⁶ Vidi iyanni henye, “Ongo te hala mo owo Lazara.” ³⁷ Kya zë maakowe iyanni henye, “Mo ayëhu komo 'ba vo komoköndu. Kö'du a'di mo ato'bo dë sesi Lazara kazi koli?”

Yësu injë Lazara tümü koli

³⁸ Yësu zo kö'du sösu kyedre aba. Here mo i'bë dawogo mati na wöru yitö alulu nbiri ho mo. ³⁹ Neene mo ayada zi vidiyë yitö ne lulu 'de yaga ta ho mo. Mora Marita iya henye, “Yere, ayolo henye, Lazara oli go mo o'do ku sowo, ehe këzi mo atëdi ku na kyënyë.”

⁴⁰ Yësu aya'ba do mo henye, “Gba ma yada dë zi yi henye, ezë edi koma aba, akongo bikanyi kyedre 'ba Wiri?” ⁴¹ Tapëti alulu yitö ne ku dakapa, Yësu ongo bi riyë zi komoriyë ehe amötu henye, “Bu, mo'do öwö'di zi yi ga kö'du aya'ba da mötu 'bama. ⁴² Ma yolo ku 'duwi edi da mötu 'bama ya'ba. Mora miya nenyë, here zi vidi kinye nee koma yi ra utu ma.” ⁴³ Mati Yësu inde mötu ku, mo ako'jo wa gu kyembe aba henye, “Lazara, ayi yaga!” ⁴⁴ Kora mati oli ne ayi gbo yaga. Kala mowe ehe ndi mowe olo mi bongö 'ba wakusu, ehe bongö ayöfu komo mo. Yësu ayada zi vidiyë henye, “Inge mo, ile mo mi'bë.”

Yere 'ba zi kofo Yësu

(Mt 26:1-5; Mk 14:1-2; Lk 22:1-2)

⁴⁵ Vidi kayo mati ayinni zi Mariya, ongɔnni wa mati Yesu o'dɔ, zɛ i'dinni koma 'benni mi mo. ⁴⁶ Maakowe i'benni zi Farasiye ehe ayadanni wa mati Yesu o'dɔ. ⁴⁷ Here kyedree 'ba vo karase ehe Farasiye atɔtɔ rɛ nni bi kolɔ iyanni henye, "A'di ra da ko'de? Kora nenye edi kyine 'ba ko'du koro ko'dɔ kyɔ. ⁴⁸ Eze da dɔre mo de yaanya aba, vidi biya aki'dinni koma 'benni mi mo. Neene vidi 'ba Roma atayinni ehe akayananni yekelu dakaɔ 'beze aba."

⁴⁹ Ma kolɔ maako temi ze ru mo Kayafa, mo ra kyedre 'ba vo karase mi kɔɔ nani. Mo ame'do riyɛ iya henye, "E vidi nee, anze de ko'du yɔɔ aba. ⁵⁰ Ayɔle de henye, edi na laka zi vidi kolɔ koli ko'du vidiyɛ, kazi dakaɔ ra yaɔa biya?" ⁵¹ Kayafa iya nenye de na bi de ni. Kaa kyedre 'ba vo karase mi kɔɔ nani, mo edi kume henye, Yesu ra akoli ko'du 'ba dakaɔ. ⁵² Yesu oli de nje ko'du dakaɔ 'ba Yude. Mo akoli zi kika vidi biya 'ba Wiri mati apere rɛ nni ne zi dɔko bi kolɔ.

⁵³ Here mi ko'do nani dagba ani, vidi ayetonni mala ko'dɔ zi Yesu ki'di zi koli. ⁵⁴ Ga ko'du mala rɔ mo nenye, Yesu adɔrɔ lasi toko mi vidi kayo na dangɔlɔ. Mo i'be mi gawo 'ba Efaremo, mati kara dakapa lipi, ehe mo alima ani vo lo'bo 'beniyɛ eti.

⁵⁵ Edi ku kara zi karama kadra 'ba laga 'ba koli. Vidi kayo 'ba Yude mati alimanni yaga temi dakaɔ, ayinni mi Yerusalema zi rɛ nni ko'jo nbala ga ko'du 'ba karama. ⁵⁶ Ze omani bi toko ko'du Yesu. Neene mati ze edinni mi yekelu, ze ako'jonnɔ oka ma kolɔ maako henye, "Asosu 'beyi mo atayi de kinye mi karama 'ba laga 'ba koli?"

⁵⁷ Kyedre 'ba vo karase ehe Farasiye ayadannī zi vidīyē zi zē yolo, ēzē vidī maako tēmī zē ongo Yēsu ku. Nenyē ēdī hala zē asōsunnī zi mo kīri.

12

Alōmu Yēsu mī Beteniya (Mt 26:6-13; Mk 14:3-9)

¹ Ko'do modaka ta komo karama 'ba laga 'ba koli Yēsu i'bē hulēhu zi Beteniya, bi mati Lazara alima 'dōmo, mati mo injē mo tēmī koli. ² Zē o'dōnnī wakonyo zi mo ani. Marita ra ako'jo. Lazara kōlō tēmī vidī mati ēdīnnī alima ani da tarabiza Yēsu aba. ³ Mariya oba maṛanji yēningutru ogo kōhi kyedre aba ehe ope burutu Yēsu. Mo akyito zē zi teli yēvu 'bēnī aba, ehe tato ndili 'ba yēningutru ne, oso mī loko ne. ⁴ Vo lō'bō maako ru mo Yudasi Sikereto ēdī ani, mati mo ra omba tī'bē zi Yēsu susu. Mo ako'jo henye, ⁵ “Kō'du a'di yēningutru nenyē ogo dē yaga kōhi ṅbirīri lamiwota aba ehe kōhi mo kī'dī zi vo leriye?” ⁶ Yudasi tīnyō asōsu kō'du vo leriye dē. Mo ako'jo kō'du ne ga kō'du mo injē aṅboro 'ba kōhi ehe mī kadra maako aba akalogo zi nī.

⁷ Yēsu aya'ba dō mo iya henye, “Ile mo kutu nī aba. Mo ma sesi wa mati mo ēdī mo aba kō'du kadra 'ba ma kusu. ⁸ Atēdiyē 'duwī vo leriye eti, mora atanze dē 'duwī ma aba.”

Yeṛe zi Lazara kofo

⁹ Vidī kayo ayinnī mati zē owonnī henye Yēsu ēdī ani. Zē ombannī kpa zi Lazara kongō ga kō'du Yēsu injē mo tēmī koli. ¹⁰ Here kyedree 'ba vo karase o'dōnnī yeṛe kpa zi Lazara kofo.

11 Mo ra i'di vidi kayo zi de nni koto kazi ze ehe ki'di koma 'benni mi Yesu.

Yesu odu mi Yerusalema

(Mt 21:1-11; Mk 11:1-11; Lk 19:28-40)

12 Ko'do ma vere aba vidi kayo edinni mi Yerusalema ko'du 'ba karama. Mati ze owonni henye Yesu edi tayi ko'du 'ba karama, 13 ze obanni mbili 'ba mbiro ehe i'benni yaga zi mo mete. Ze agbogbo he nni henye, "Wayeto zi Wiri! Wiri mi'di ya'da zi vidi mati ayi mi ru 'ba Yere! Wiri mi'di ya'da zi Yere 'ba Yiserele!"

14 Yesu i'ja makakya aho do mo kaa wayoru iya, 15 "Vidi 'ba Ziyono, ere de! Yere 'be edi tayi yaanya aba mo edi ataho da makakya."

16 Mi dagba mo vo lo'bo 'ba Yesu ayolanni de. Mora tapeti mo iri wayeto kazi Wiri ku, ze asosunni henye, wayoru iya nenyeko'du mo ehe ze odanni nenyeko'do mo.

17-18 Vidi kayo ayinni zi Yesu ga ko'du ze onganni mo Lazara ko'jo yaga temi dawogo. Ze asesinni nduwe me'do ko'du mo ehe ko'du koro nenyeko'du ayinni zi Yesu ga ko'du ze onganni ko'du kyine wakoro mati mo o'do. 19 Mora Farasiye iyanni zi oka ma kole henye, "Waako anza de da to'bo ko'do! Vidi biya mi damoku ne edinni kusu ga Yesu."

Girigi maakowe ombanni zi Yesu kongu

20 Vidi 'ba Girigi maakowe i'benni Yerusalema zi motu mi kadra 'ba karama aba. 21 Pilipo ta Beteseyida mi Galilaya edi kpa ani. Here ze i'benni zi mo iyanni henye, "Kyedre, domba ze zi Yesu kongu."

²² Pilipo ayada zi Anderiya. Zë riyö ne i'bënni zi Yësu ayadanni zi mo. ²³ Yësu iya henye, “Kadra yaanya aba ɔko ku kö'du Wisi 'ba Vidi zi kiri kyedre wayeto. ²⁴ Ma yada tinyö zi ye, i'jö 'ba nyenyo mati alëpi dakaŋo atanza dë kyɔ ta da i'jö ma kölö nje ëzë oli. Mora ëzë oli, ako'jo nyenyo kyɔ. ²⁵ Ëzë ɔwɔ didi yi, akayölu. Ëzë ila kö'du 'ba damöku nenyë, aki'di didi ma nburu zi yi. ²⁶ Ëzë alitu zi ma, ati'bë ma aba. Vo litu 'bame atëdinni ma aba bi mati ma 'domo. Ëzë alitu zi ma, 'Bu ma akoro yi.”

Yësu ame'do kö'du koli 'bëni

²⁷ “Yaanya aba ma mi riti kyedre, ma yolo dë a'di ra ma kiya. Mora ma ko'jo 'Bu dë zi sesi ma tëmi kadra 'ba riti nenyë. Tinyö mayi mi damöku kö'du kadra 'ba riti nenyë. ²⁸ Here 'Bu, ika wayeto zi ru yi.” Gu ayi ta komoriyë iya henye, “Mika wayeto ku nzo zi ma, ehe ma ko'do löhu.”

²⁹ Mati vidi kayo nee owonni gu ne, kya zë maakowe asösu 'bënni piwo ra. Agamowe asösu 'bënni malayika ra ame'do zi Yësu.

³⁰ Here Yësu ayada zi vidi kayo nee, “Gu nani ame'do zi konyiye, anza dë ma. ³¹ Vidi 'ba damöku nenyë yaanya aba o'do vurë 'bëzë ku, ehe yere 'ba damöku nenyë u'du ku nzo yaga. ³² Ëzë umbë ma ku riyë ta dakaŋo, ma ko'do vidi biya komba zi tayi zi ma.” ³³ Yësu ëdi ame'do kö'du gëri ma aki'di ni zi kofo.

³⁴ Vidi kayo nee iyanni zi Yësu henye, “Wayöruwë 'ba kö'du ki'di ayandi henye, Korisito ne akalima nburu. Hala ɔ'bo kiya henye

Wisi 'ba Vidī akinjē riyē zi koli? Ēyī ra nenye Wisi 'ba Vidī?”

³⁵ Yēsu aya'ba dɔ mo iya henye, “Bikanyi atēdiyē aba nje tisiwa. Alasiye mī bikanyi ēzē atɔ'be here kazi bikōndu akakowe. Kora mati mo alasi mī bikōndu, mo ayɔɔ dē nēdi tī'bē kila.

³⁶ Ome mī bikanyi mati ēdiyē aba, here atayiye na gisi 'ba bikanyi.”

Vidī ombannī dē zi tēdī koma aba mī Yēsu

Tapētī Yēsu iya kō'du nenye, mo ila bi nani i'bē mī bi 'ba rakoho. ³⁷ Mo o'do kyinē 'ba kō'du koro kyɔ mī kutē vidī kayo, mora zē gba zɔ ombannī dē zi tēdī koma aba mī mo. ³⁸ Nenyē o'do rē nī zi wa mati nēbī Yisaya iya atayi tīnyō, “Yere, ēyī ra oma mī kō'du kise 'beze? Ehe ēyī ra ongo kyigo kyedre 'bēyī?” ³⁹ Vidī ɔ'bōnnī dē zi tēdī koma aba mī Yēsu, ga kō'du Yisaya iya kpa henye,

⁴⁰ “Wiri isi komo zē here kazi ɔ'bōnnī bi kongɔ, ehe o'do di'di zē na kyigo

here zē ɔ'bōnnī dē yɔɔ.

Mo o'do nenye here kazi zē a'bannī zi mo ehe kɔ'jɔ zē.”

⁴¹ Yisaya iya nenye, ga kō'du mo ongo bikanyi kyedre 'ba Yēsu ame'do kō'du mo.

⁴² Here vo dagba kayo 'ba Yude kayo i'dinnī koma 'bēnnī mī Yēsu, mora zē ayadannī dē zi vidī maako, ga kō'du Farasiye i'dinnī kō'du ku nzo zi vidiyē anza dē zi wa maako kō'do zi vidī maako mati ēdī koma aba mī Yēsu. ⁴³ Vo dagbe

ombannī wayeto kazi agamowe ndra ta da mati zē ombannī wayeto kazi Wīrī.

Yēsu ayi zi damōku yomō

⁴⁴ Mī gu kyembe aba Yēsu iya henye, “Vīdī mati ēdī koma aba mī ma, ēdī kpa koma aba mī vīdī mati utu ma. ⁴⁵ Ehe vīdī mati ongō ma, ongō vīdī mati utu ma ne ku. ⁴⁶ Ma bikanyi mati ayi mī damōku. Vīdī mati ēdī koma aba mī ma, alima dē mī bikōndu. ⁴⁷ Ma ra dē vīdī mati ako'dō vurē kyēnyē 'ba vīdī naniye mati ombannī dē zi koro kō'du yandi 'bama. Mayi zi yomō vīdī 'ba damōku nenyē, anza dē vo kō'dō vurē kyēnyē 'bēzē. ⁴⁸ Mora vīdī mati omba ma dē ehe wayandi 'bama, ako'dō vurē kyēnyē rō mo mī ndundu 'ba kō'do aba, mī wa mati miya. ⁴⁹ Manza dē me'do ga kō'du 'bama. Miya nje wa mati 'Bu mati utu ma ayada zi ma kiya. ⁵⁰ Ma yolo ku kō'du kī'dī omo akika dīdī ma ḡburu. Nenyē ēdī hala ma yada zi ye te wa mati 'Bu ayada zi ma.”

13

Yēsu akaka burutu 'ba vo lō'bō 'bēniyē

¹ Gba ta komo karama 'ba laga 'ba koli, Yēsu ayolo henye kadra ne oko ku kō'du nī zi kila damōku nenyē ehe zi ta'ba zi 'Bu. 'Duwī mo omō vo lō'bō 'bēniyē mī damōku nenyē, ehe mo omō zē le mī ndundu.

² Gba kazi biyeto 'ba wakonyo 'ba hutaga, Satani o'dō Yudasi, wisi 'ba Simona Sikereto, omba zi Yēsu susu. ³ Yēsu ayolo nayi kazi Wīrī ehe na tī'bē hulēhu zi Wīrī. Mo ayolo kpa henye,

'Bu i'di kyigo ku biya zi ni. ⁴ Here kadra 'ba wakonyo aba Yesu enyi riyë, mo oto bongõ 'ba rë ni ma ta yaga, ehe olo bongõrateli toko bi ko'di kida 'ba gë ni. ⁵ Mo i'di wini mi siko kyedre. Here mo ayeto burutu vo lö'bõ 'bëniyë kaka ehe kyitru zë bongõrateli mati mo usu ne aba. ⁶ Mora mati mo ayi zi Simona Petero, ako'jo henye, "Yere, ëdi ti'bë zi burutu ma kaka?"

⁷ Yesu aya'ba iya henye, "Tinyõ ayolo wa mati mëdi ko'do ne dë, mora yaa akayolo." ⁸ Petero aya'ba henye, "Akaka burutu ma dë!" Yesu ayada zi mo henye, "Ëzë ma kaka yi dë, tinyõ anza dë 'bama."

⁹ Simona Petero aya'ba do mo iya henye, "Yere, akaka dë nje burutu ma, akaka kala ma da ma aba!" ¹⁰ Yesu aya'ba henye, "Vidi mati akaka rë nni ku ehe ëdinni ku biya nbala omba nje zi burutu zë ra kaka. Ehe e vo lö'bõ 'bame, ëdiyë nbala nje vidi kolõ tēmi yë." ¹¹ Yesu ayolo eyi ra akasusu ni. Kö'du nere ra mo iya henye, nje zi ma kolõ tēmi yë.

¹² Tapëti Yesu akaka burutu vo lö'bõ 'bëniyë ehe usu bongõ 'bëni ma ta yaga ne hulëhu, mo alima akaño löhu. Here mo iya henye, "Ayole wa mati mo'do zi ye ne ku?" ¹³ Ako'jowe ma Raboni 'be ehe Yere, ehe akiye here, ga kö'du nani eyi ra ma. ¹⁴ Ëzë Yere 'be ehe vo komoyandi akaka burutu wë, o'de kpa te here zi oka ma kolõ maako. ¹⁵ Ma yada go mo ku, ehe o'de zi oka ma kolõ maako te wa mati mo'do zi ye. ¹⁶ Ma yada tinyõ zi ye henye, vo lituwë anzanni dë kyedre ta da vo dë nni, ehe vo litu kike anzanni dë kyedre

ta da vidi mati utu ze ne. ¹⁷ Ayole wa nenyee ku. Wiri aki'di ya'da zi ye, ezē o'de zē.”

¹⁸ “Manza dē ame'do kō'du wē biya. Ma yolo zē mati ma jeli ne ku. Mora wa mati wayōru iya, atayi tinyō. Mo iya henye, ‘Kora mati onyo wa ma aba ne, opi rē nī ku na vo wehe ra ma.’

¹⁹ Mēdi yada nenyee zi ye biya gba kazi rē nī ko'do, here ezē o'do rē nī ku, akome ēyī ra ma.

²⁰ Ma yada tinyō zi ye, vidi mati iri vo litu 'bame kalakyedre aba, iri ma kpa kalakyedre aba, ehe vidi mati iri ma kalakyedre aba, iri ne vidi mati utu ma.”

Yēsu ayada wa ma ako'do rē nī zi nī

(Mt 26:20-25; Mk 14:17-21; Lk 22:21-23)

²¹ Tapēti Yēsu iya kō'du nenyee, mo riti kyedre aba ehe ayada zi vo lō'bō 'bēniyē henye, “Ma yada tinyō zi ye henye, vidi ma kolo tēmi yē akasusu ma.”

²² Dē zē wiriwiri kō'du wa mati mo iya ne. Zē nje bi kongō aba da oka ma kolo. ²³ Yēsu owo vo lō'bō mati ēdi alima kara zi nī bi 'ba wakonyo, ²⁴ ehe Simona Petero o'do kala nī zi vo lō'bō nenyee zi ki'ja ma vala ra Yēsu ame'do kō'du mo.

²⁵ Here vo lō'bō ne idē rē nī zi Yēsu ehe ako'jo henye, “Yere, ma vala ra tēmi ze ēdi ame'do kō'du mo?” ²⁶ Yēsu aya'ba iya henye, “Ma kusu nzoyi mangolo'bo nenyee mi gbenje ehe ki'di zi vidi mati mēdi ame'do kō'du mo.” Here Yēsu usu mangolo'bo gbo ehe i'di zi Yudasī, wisi 'ba Simona Sikereto. ²⁷ Kandi Satani aya'ja da Yudasī. Yēsu iya henye, “Yudasī, i'bē kandi o'do wa mati zi yi ko'do.” ²⁸ Vidi maako bi 'ba wakonyo ne ayolo kō'du mati Yēsu iya ne dē.

²⁹ Mora ga kö'du Yudasi ra na vo kōhi sesi, kya zē maakowe asōsunnī henye Yēsu ayada zi mo zi kogo wa mati zē ombannī kö'du karama. Agamowe asōsunnī henye Yēsu ayada zi mo zi kōhi kī'dī zi vo leri.

³⁰ Yudasi oba nzoyi mangɔɔ'bo, i'bē yaga. Ēdī ku nzo yɔndo.

Kö'du kī'dī kyiyi

³¹ Tapētī Yudasi i'bē ku Yēsu iya henye, “Yaanya aba Wisi 'ba Vidī akī'dī wayeto, ehe mo akika wayeto zi Wiri. ³² Here tapētī Wiri akiri wayeto ku ga kö'du mo, Wiri akī'dī wayeto zi mo, ehe Wiri ako'do kandi. ³³ Gisi ame, ma tēdiyē aba nje tisiwa aba na konda. Here akome ma, mora aki'je ma dē. Ma yada zi ye kpa kaa ma yada zi Yude. ‘Ɔ'be dē ti'bē bi mati mēdī ati'bē.’

³⁴ Mora mēdī kö'du kī'dī kyiyi kī'dī zi ye: ɔwe oka ma kōlō maako, kpa te kaa mati mɔwɔ e.

³⁵ Ēzē ɔwe oka maakowe mī gērī nenye, vidī biya akayɔlɔnnī e vo lö'bo 'bama ra.”

Lömu 'ba Petero

(Mt 26:31-35; Mk 14:27-31; Lk 22:31-34)

³⁶ Simona Petero ako'jo henye, “Yere, ēdī ti'bē kila?” Yēsu aya'ba henye, “Ɔ'bo dē ti'bē ma aba yaanya aba, mora yaa dagba ani ati'bē.”

³⁷ Petero ako'jo henye, “Yere, kö'du a'di mɔ'bo dē ti'bē yī aba yaanya aba? Ma koli kö'du yī!”

³⁸ Yēsu ako'jo henye, “Tinyō akoli kö'du ma? Ma yada zi yī tinyō, gba kazi zanga yēru yapa, akiya da wota henye ayɔlo ma dē.”

14

Yësu gëri ra zi 'Bu

¹ Yësu iya zi vo lö'bö 'bëniyë henye, “Asösuwë kö'du dë. Èdiyë koma aba mī Wiri. Ome kpa mī ma. ² Loko kayo ëdi mī liṅɔ 'ba 'Bu ma. Ma yada nenyë dë zi ye, ëzë anza dë tinyö. Mëdi ti'bë ani zi bi kɔ'jo biya zi ye na kölö kölö. ³ Tapëtī mo'dɔ nenyë ku, ma ta'ba hulëhu kobe ma aba. Here da tedi ze ga bi kölö. ⁴ Ayole gëri mati mëdi ati'bë zi mo ne ku.”

⁵ Toma iya henye, “Yere, da yolo dë ëdi ati'bë kila! Hala da to'bo yolo gëri ne?” ⁶ Yësu aya'ba henye, “Ma gëri, tinyö, ehe didi! Kazi ma, vidi maako ɔ'bo dë ti'bë zi 'Bu. ⁷ Èzë tinyö ayole ma, akayole 'Bu. Mora tēmi ndenye dagba ani, ayole mo ku, ehe onge mo ku.”

⁸ Pilipo iya henye, “Yere, ayada zi ze 'Bu ne, nani biya wa mati domba.” ⁹ Yësu aya'ba henye, “Pilipo, mëdi yi aba kadra konda aba ayolo dë ma eyi? Èzë ongo ma, ongo 'Bu ku. Hala ato'bo ha ma ko'jo zi yada 'Bu zi ye? ¹⁰ Oma dë henye, ma kölö 'Bu aba ehe 'Bu kölö ma aba? Wa mati miya, miya dë kö'du ma. 'Bu mati alima mī ma, ra o'dɔ wa nenyee. ¹¹ Ome mī ma ëzë miya henye, 'Bu kölö ma aba ehe ma kölö 'Bu aba. Mandere ome mī ma kpa nje ga wa mati mëdi ako'dɔ. ¹² Ma yada tinyö zi ye henye ëzë ëdiyë koma aba mī ma, ako'de kpa te wa mati mëdi ako'dɔ. Ako'de wa kyedre maakowe ndra, ga kö'du mëdi ku ti'bë hulëhu zi 'Bu. ¹³ Ako'jowe ha ma, ehe ma ko'dɔ wa mati ako'jowe kö'du mo. Gëri nenyë aba,

Wisi akika wayeto zi 'Bu. ¹⁴ Ma ko'do wa mati ako'jowe ha ma zi ko'do mi ru ma.”

Alömu zi kutu Lawo Laka

¹⁵ Yësu iya zi vo lö'bö 'bëniyë henye, “Ëzë owe ma, ako'de kaa mi'di kö'du mo. ¹⁶ Here ma kako'jo ha 'Bu zi kutu zi ye Lawo Laka mo akakonyiye ehe 'duwi atëdiyë aba. ¹⁷ Lawo Laka akayada zi ye wa mati tinyö. Vidi 'ba damöku nenyë o'bonni de kiri Lawo, ga kö'du zë ongonni de mandere yolo mo. Mora ayole Lawo ku, ga kö'du mo ëdiyë aba ehe akasesi lima nduwë mi yë. ¹⁸ Ma kile de kaa wala. Ma tayi hulëhu zi ye. ¹⁹ Tisiwa aba vidi mi damöku nenyë o'bonni dekpe zi ma kongö, mora akonge ma. Ehe ga kö'du ma lima, akalime. ²⁰ Here akayole ma kölö 'Bu aba. Akayole, e kölö ma aba, ehe ma kölö ëti. ²¹ Ëzë owe ma, ako'de wa mati miya, ehe 'Bu atowo e. Ma katowo e kpa ehe yada zi ye ma kaa a'di.”

²² Yudasi ma agamo anza de Yudasi Sikereto, ame'do riyë ako'jo kö'du henye, “Yere, mi me'do 'bëyi ne a'di akayada zi ze yi kaa a'di, mora ayada de zi vidi 'ba damöku nenyë?” ²³ Yësu aya'ba henye, “Ëzë vidi maakoowo ma, zë akoronni ma. Here 'Bu ma akatowo zë, da katayi zi zë ehe lima mi zë. ²⁴ Mora vidi matiowo ma de, oro ma de. Wa mati owowe miya tinyö ayi de kazi ma, mora kazi 'Bu mati utu ma.”

²⁵ “Ma yada kö'du nenyee zi ye, mati ma gba ëti. ²⁶ Mora Lawo Laka atayi akakonyiye. Lawo Laka mati 'Bu ma akutu mi ru ma, akayandi wa

biya zi ye ehe ako'de zi sösu wa biya mati ma yada zi ye.”

²⁷ “Mĩ'dĩ rakyëyi zi ye, kyinë 'ba rakyëyi mati nje ma tɔ'bo kĩ'dĩ. Anza dë kaa rakyëyi mati damöku nenyë akĩ'dĩ. Here asösuwë dë mandere tere. ²⁸ Owowe ma ku nzo kiya henye, mēdĩ atĩ'bē ehe ma tayi kpa hulēhu zi ye. Ēzē tĩnyö ɔwe ma, ēdīyē rakyenyi aba mēdĩ ku tĩ'bē hulēhu zi 'Bu, ga kō'du mo ēdī kyedre ta da ma. ²⁹ Mēdĩ yada zi ye nenyë gba kazi ma tĩ'bē, here ēzē o'dɔ rē nĩ, atēdīyē koma aba mĩ ma. ³⁰ Mɔ'bo dekpe me'do eti na konda, ga kō'du yere 'ba damöku nenyë ēdī tayi. Mora mo anza dë kyigɔ aba da ma. ³¹ Moro wa mati 'Bu ma ayada zi ma ko'dɔ, here zi vidĩ biya mĩ damöku ne akayɔlɔnnĩ mɔwɔ mo. Ēdĩ ku kadra 'ba zi ze tĩ'bē yaanya aba.”

15

Yësu tĩnyö kaga tana

¹ Yësu iya zi vo lö'bo 'bēnīyē henye, “Ma tĩnyö kaga tana, 'Bu ma ra vo kyeti yaka. ² Mo iga ngora 'bama biya mati anannĩ kɔlɔ dë yaga. Mora mo ikye ŋbala biya da ngora mati ēdī tana kɔlɔ, here zi tana kɔlɔ kyɔ. ³ E ku nzo ŋbala ga kō'du wa mati miya zi ye. ⁴ Alime na rakida zi ma, ehe ma kalima na rakida zi ye. Te kaa ngora ɔ'bo dë tana kɔlɔ nje ēzē alima na rakida zi kaga, here ɔ'be dë tana kɔlɔ nje ēzē alime na rakida zi ma.”

⁵ “Ma kaga ra, e ngora ra. Ēzē alime na rakida zi ma, ehe ma kalima na rakida zi ye tane kɔlɔ

kyɔ. Mora ɔ'be dē wa maako ko'do kazi ma. ⁶ Ēzē alime dē na rakida zi ma, aku'duwē yaga. Atēdiyē kaa ngora kyitru mati atoto bi kōlō ehe o'bo mī wa'do. ⁷ Ēzē alime na rakida zi ma ehe kō'du yandi 'bama mayi na kapa 'be, here ato'bo mōtuwē ga wa mati ombē, ehe mōtu 'be akaya'ba do mo. ⁸ Ēzē ayiye ku na kolo laka 'ba vo lō'bō 'bame, akoro 'Bu ma. Ne akayada henye, e vo lō'bō 'bame. ⁹ Mowɔ e kaa 'Bu ma owɔ ma. Here alime mī watowɔ 'bama. ¹⁰ Ēzē orowe ma, ma kasesi towɔ e kaa 'Bu ma asesi towɔ ma, ga kō'du moro mo.”

¹¹ “Ma yada nenyē zi ye, zi ye tēdiyē mī rakyenyi 'bama ma ŋburu. ¹² Yaanya aba ma yada zi ye zi towɔ oka ma kōlō maako kaa mowɔ e. ¹³ Gērī ma laka ndra zi yada watowɔ kō'du aboke, ēdī zi koli kō'du zē. ¹⁴ E aboka ma ra, ēzē orowe ma. ¹⁵ Ma ko'jowē dē vo litu 'bame, ga kō'du vo litu ayolonni dē a'di ra kyedre 'bēzē ēdī ako'do. Ma me'do zi ye kaa aboka me, ga kō'du ma yada ku biya zi ye wa mati 'Bu ma ayada zi ma. ¹⁶ E ra dē ajeliye ma, ma ra ma jeliye kutu yaga zi tana kolo, kyinē 'ba kolo ma akalima ŋburu. Here 'Bu ma aki'di zi ye wa mati ako'jowē kazi mo mī ru ma. ¹⁷ Here mī'di kō'du zi ye zi towɔ oka ma kōlō.”

Damöku 'ba rakiyi

¹⁸ “Ēzē vidī 'ba damöku nenyē ayiye, asösuwē henye zē iyinni ma dagba. ¹⁹ Ēzē e zi damöku, vidī 'bomo atowe. Mora anze dē zi damöku. Ma jeliye zi damöku nenyē kila hulēhu. Kō'du nenyē ra vidī 'bomowe ēdinni ye kiyi. ²⁰ Asösuwē hala

ma yada zi ye henye vo litu anzanni dë kyedre ta da kyedre 'bënni. Here ezë vidi o'donni ma na kyënyë, zë ako'donni yë na kyënyë. Ezë zë oronni kö'du yandi 'bama, zë akoronni 'be. ²¹ Vidi ako'donni kpa te zi ye wa mati zë o'donni zi ma. Zë ako'donni ga kö'du e zi ma, ehe zë ayolonni vidi mati utu ma ne dë. ²² Ezë mayi dë ame'do zi zë, o'donni vurë kyënyë dë rë zë. Yaanya aba zë ɔ'bonni dë kiya anzanni ra dë. ²³ Vidi mati iyi ma iyi 'Bu ma kpa. ²⁴ Mo'do wa maakowe vidi maako gba o'do dë. Ezë zë ongonni ma dë wa nenyee ko'do, o'donni vurë kyënyë dë rë zë. Mora zë ongonni ma wa nenyee ko'do, ehe zë zo ma kiyi ehe 'Bu ma kpa. ²⁵ Nenyë ra hala wayöru edinni tinyo mati zë iyanni henye, vidi iyinni ma önbö kazi kö'du mo.”

²⁶ “Ma kutu zi ye Lawo mati ayi kazi 'Bu ehe ayada wa mati tinyo. Lawo Laka akakonyiye ehe akayada kö'du ma zi ye. ²⁷ Here akayade kö'du ma kpa zi oka maakowe, ga kö'du ediyë ma aba tëmi biyeto.”

16

¹ “Mëdi yada zi ye wa nenyee, here kazi oto de 'de. ² Akore yaga tëmi bi 'ba mötu, ehe kadra atayi mati vidi akofonniyë, ehe zë asösunni, nëdinni kö'du laka ra ko'do zi Wirä. ³ Zë ako'donni wa nenyee ga kö'du zë ayolonni 'Bu mandere ma dë. ⁴ Mëdi akiya nenyë zi ye yaanya aba, here ezë kadra ne ayi ku akasösuwë wa mati miya.”

Lɔɔ 'ba Lawo Laka

“Ma mēdi ēti tēmī dagba, ehe here ma yada wa nenyee dē zi ye. ⁵ Mora yaanya aba mēdi ku ti'bē hulēhu zi 'Bu mati utu ma, ehe vīdi maako tēmī yē ako'jo ha ma dē mēdi ti'bē kila. ⁶ E kazi rakyenyi biya ta bi kō'du nenyē kowo. ⁷ Mora ma yada zi ye, mēdi ti'bē zi kō'do wa mati ēdi na laka kō'du wē. Kō'du nenyē ra mēdi ti'bē 'de. Lawo Laka ɔ'bo dē tayi zi ye konyi le ezē mile ku. Mora tapēti mi'bē ku, ma kutu mo zi ye. ⁸ Lawo atayi akayada zi vīdi 'ba damōku nenyē kō'du tīnyō kō'du yaɲa ehe kō'du laka 'ba Wiri ehe vurē. ⁹ Lawo akayada zi zē henyē, zē 'ba kō'du kyēnyē kō'do, ga kō'du zē anzannī dē koma aba mi ma. ¹⁰ Zē na litē kō'du wa 'ba Wiri mati ēdi tīnyō na laka, ga kō'du mēdi ti'bē zi 'Bu, onge ma dekpe löhu. ¹¹ Ehe zē na litē kō'du 'ba vurē, ga kō'du Wiri ikye vurē 'ba yere 'ba damōku nenyē ku nzo.

¹² “Mēdi kō'du aba kyɔ zi kiya zi ye, mora yaanya aba atēdi ndra ta da mati ato'be yolɔ. ¹³ Lawo ayada wa mati tīnyō ehe atayi gage mi tīnyō ma ndo. Lawo ame'do dē ga kō'du ni. Mo akayada zi ye nje wa mati mo owo kazi ma, ehe mo ako'do zi ye yolɔ a'di ra ēdi ti'bē zi rē ni kō'do. ¹⁴ Lawo aki'di wayeto zi ma kō'du kise 'bama koba ehe yada mo zi ye. ¹⁵ Wa biya mati 'Bu ēdi mo aba 'bama ra. Kō'du nenyē ra miya henyē Lawo oba kō'du kise 'bama ehe yada mo zi ye.”

Kō'du sōsu akopi rē ni mi rakyenyi

¹⁶ Yēsu ayada zi vo lö'bō 'bēniyē, “Tisiwa aba, onge ma dekpe, mora tapēti mo tisiwa akonge ma.”

¹⁷ Zē iyannī zi oka ma kölō maako henye, “A'di ra Yēsu iya henye, tisiwa aba donge mo dē, mora tapētī mo tisiwa aba, da kongɔ ze mo? Kō'du a'di ra mo iya henye, nēdī tī'bē zi 'Bu? ¹⁸ A'di ra 'bēnī nenye tisiwa aba, mati mo ēdī ame'do kō'du mo? Da yolo dē a'di ra mo ame'do kō'du mo.”

¹⁹ Yēsu ayolo zē ēdinnī kō'du ko'jo maakowe aba, here mo iya henye, “E na rasōsu a'di ra ma me'do kō'du mo mati miya henye tisiwa aba onge ma dē, mora tapētī mo tisiwa aba akonge ma. ²⁰ Ma yada zi ye tīnyō henye, akuduwē ehe atēdiyē kazi rakyenyi, mora damōku atēdi rakyenyi aba. Atēdiyē kazi rakyenyi, mora yaa atēdiyē na rakyenyi. ²¹ Ēzē mbara omba ku zi ko'jo, mo ēdī mī watɔ kyedre. Mora tapētī ko'jo, watɔ ne ölu ta do mo ehe na rakyenyi, ga kō'du mo ika wisi ku mī damōku ne. ²² E yaanya aba kazi rakyenyi, mora yaa ma konge, ehe atēdiyē na rakyenyi. Vīdī maako ɔ'bo dē zi kobe ta gēri mati asōsuwē.

²³ “Ēzē kadra nani ayi ku, ako'jowe ha ma dē kō'du wa maako. Ma yada tīnyō zi ye henye, 'Bu akī'dī zi ye wa mati ako'jowe kō'du mo mī ru ma. ²⁴ Ako'jowe kō'du wa maako dē gba mī gēri nenye. Mora yaanya aba ako'jowe mī ru ma ehe akīriyē.”

Ta'da Damōku

²⁵ “Ma me'do ha kahi aba zi yada wa nenye zi ye. Mora kadra mo atayi mati ma kame'do dekpe ha kahi aba, mora ma kame'do zi ye huwē kō'du 'ba 'Bu. ²⁶ Akako'jowe ha 'Bu mī ru ma. Ma kako'jo ho mo dē zi ye. ²⁷ Wīri 'Bu ɔwe ga

kö'du ɔwe ma, ehe ome mayi kazi mo. ²⁸ Mayi ta ra 'Bu mi damöku ne, mora mēdi ku damöku ne kila ta'ba zi 'Bu."

²⁹ Vo lö'böwē iyanni henye, "Yaanya aba ēdi ku ame'do huwē zi ze! Anza dē ame'do ha kahi aba. ³⁰ Ndundu mo aba da yɔɔ ku henye, ayɔɔ wa biya, ehe omba dē zi vidi hē yi ko'jo. Yaanya aba doma tinyö ayi ta ra Wiri."

³¹ Yēsu aya'ba henye, "Tinyö yaanya ome ma ku? ³² Kadra atayi ehe ēdi ku nzo kinye, mati akapere biya. Vidi biya na kōlō kōlō tēmī yē ati'bē hulēhu liɔ ehe akila ma na bi da ma. Mora 'Bu atēdi ma aba, ma tanza dē kutu ma aba. ³³ Ma yada nenye zi ye, zi ye tēdiyē rakyēyi aba mi di'di ye ga kö'du ma. Ēzē ēdiyē mi damöku ne, atēdiyē riti aba. Mora ēdiyē kazi tere, ma'da damöku ne ku."

17

Yēsu amötu kö'du vo lö'bö 'bēniyē

¹ Tapēti Yēsu inde me'do ku zi vo lö'bö 'bēniyē, mo ongo bi riye komoriyē ehe amötu, "Bu, kadra ɔko ku zi yi ki'di wayeto zi Wisi 'bēyi, here zi mo ki'di wayeto zi yi, ² ga kö'du i'di kyigo ku zi mo ta da vidi biya, here mo aki'di didi ma nburu zi vidi biya mati i'di zi mo. ³ Didi ma nburu ēdi zi yɔɔ yi, Wiri ma nje tinyö, ehe zi yɔɔ Yēsu Korisito, mo mati utu. ⁴ Mi'di wayeto zi yi kinye dakaɔ zi ko'do wa biya i'di zi ma ko'do. ⁵ Yaanya aba 'Bu, i'di hulēhu zi ma wayeto mati mēdi mo aba yi aba gba damöku ne o'do dē.

⁶ "I'di vo lö'bö maakowe ku zi ma tēmī damöku nenye ehe ma yada zi zē, yi kaa a'di. Zē 'bēyi ra,

mora i'di zë zi ma, ehe zë oronni yi. ⁷ Zë ayolonnï henye, i'di zi ma biya wa mati mëdi mo aba. ⁸ Ma yada zi vo lö'bö 'bame wa mati ayada zi ma, ehe zë ombanni do mo. Zë ayolonnï mayi kazi yi, ehe zë omani yi ra utu ma.

⁹ “Mëdi amötu kö'du zë, mora anza dë kö'du zë 'ba damöku nenyë. Vo lö'bö 'bame 'bëyi ra, ehe mëdi amötu kö'du zë. ¹⁰ Biya mati mëdi mo aba 'bëyi ra, ehe biya mati ëdi mo aba 'bama ra, ehe zë i'dinni wayeto zi ma. ¹¹ 'Bu laka, manza dekpe na konda mi damöku ne, mëdi tayi zi yi, mora vo lö'bö 'bame gba mi damöku ne. Agaga gë zë kyigo 'ba ru yi aba, mati i'di zi ma ne aba, here zë atëdinni kölö oka ma kölö maako aba, kpa kaa yi ehe ma kölö. ¹² Mati mëdi zë ëti, ma sesi zë na laka kyigo mati i'di zi ma ne aba. Mongo gë zë ehe ma kölö tëmi zë ölu dë, nje ma kölö mati mo ra omba zi tölu. Nenyë o'do rë ni here zi wa mati wayöru iya zi tayi tinyö. ¹³ Ma ku da gëri ama zi yi, mora miya kö'du nenyee mati ma gba mi damöku, here vo lö'bö 'bame atëdinni kpa te rakyenyi biya mati mo'do aba. ¹⁴ Ma yada kö'du kise 'bëyi ku zi zë, mora vidi 'ba damöku nenyë iyi zë, ga kö'du zë anzanni dë zi damöku nenyë, kpa te kaa manza dë. ¹⁵ 'Bu, ma ko'jo hë yi dë zi koba vo lö'bö 'bame yaga tëmi damöku ne, mora agaga gë zë kazi Satani. ¹⁶ Zë anzanni dë zi damöku nenyë, ehe ma kpa. ¹⁷ Me'do 'bëyi ra ëdi tinyö. Here i'di tinyö nenyë, mo'do zë biya na 'bëyi. ¹⁸ Mëdi zë kutu mi damöku, kaa utu ma. ¹⁹ Mi'di ra ma ku biya zi yi ga kö'du 'bëzë, here zë mëdinni biya zi yi mi tinyö.

²⁰ “Manza dë nje amötu kö'du vo lö'bö nenyee.

Mëdi kpa amötu kö'du vidi biya mati zi tédinni koma aba ga kö'du wa mati vo lö'bö 'bame akiyanni kö'du ma. ²¹ 'Bu, momba zë biya zi tēdi kōlō oka ma kōlō maako aba, kpa kaa ma kōlō yī aba, ehe yī kpa kōlō ma aba. Ma kpa momba zē zi tēdi kōlō ze aba, here vidi 'ba damōku nenyē akomanni henye, yī ra utu ma. ²² Moro vo lö'bö 'bame mī gēri kōlō oro ma, zē mēdinni kōlō oka ma kōlō maako aba kaa ze kōlō. ²³ Ma kōlō zē aba, ehe yī kōlō ma aba, here zi zē tayinni biya kōlō. Here vidi 'ba damōku nenyē akayolōnni henye, yī ra utu ma. Zē akayolōnni henye, ɔwɔ vo lö'bö 'bame kpa kaa ɔwɔ ma.

²⁴ “'Bu, momba vidi biya mati i'di zi ma zi tēdi ma aba, bi mati mëdi 'dōmo. Neene zē akongōnni bikanyi kyedre mati i'di zi ma, ga kö'du ɔwɔ ma gba o'do damōku dē. ²⁵ 'Bu laka, vidi 'ba damōku nenyē ayolōnni yī dē, mora ma yolo yī, ehe vo lö'bö 'bame ayolōnni henye yī ra utu ma. ²⁶ Ma yada zi zē, yī kaa a'di, ehe ma kayada zi zē nduwē, here watowɔ mati ēdi mo aba kö'du ma akatayi kapa 'bēzē, ehe ma tēdi kōlō zē eti.”

18

Kiri 'ba Yēsu

(Mt 26:47-56; Mk 14:43-50; Lk 22:47-53)

¹ Mati Yēsu inde mötu ku, mo vo lö'bö 'bēni eti umunni kyēti gulu 'ba Kidrono ehe i'bē mī yaka maako. ² Yēsu ēdi 'duwi rē nni ki'ja vo lö'bö 'bēni eti ani, ehe Yudasi ayolo bi ne. ³ Here Yudasi i'bē zi yaka ne kya 'ba vo kanye 'ba Roma eti ehe vo kanye 'ba yēkēlu, kyedre 'ba vo karase ehe Farasiye ra utunni zē. Zē injēnni wa'do zi

bi yanyi ehe wa 'ba wehe. ⁴ Yësu ayɔlɔ kò'du mati omba zi ti'bè rë nì ko'dɔ ne ku nzo, mora mo ako'jo henye, “Èyì ra èdiyè koma?” ⁵ Zè aya'bannì henye, “Dèdì koma Yësu 'ba Nazereta!” Yësu ayada zi zè henye, “Ma Yësu ra!” Yudasi vo susu èdì torɔ ani dakapa zè. ⁶ Kandi zè biya a'bannì kowɔ hulèhu ehe alèpinnì dakaɲo. ⁷ Yësu ako'jo kò'du löhu henye, “Èdiyè èyì ra koma?” Zè aya'bannì dɔ mo iyannì henye, “Dèdì ze koma Yësu 'ba Nazereta.”

⁸ Kadra nenye aba Yësu aya'ba henye, “Ma yada ku nzo zi ye ma Yësu ra. Èzè ma ra èdiyè akoma, ile vidi maakowe mi'bènnì.” ⁹ Here wa biya ako'dɔ rë nì, kaa mo iya, “Ma yölu vidi ma kölö mati i'dì zi ma ne dè.”

¹⁰ Simona Petero ika kulu nì aba. Mo oto yaga tëmì silikpa ehe otra Malahisi, vo litu 'ba kyedre 'ba vo karase, ehe iga mbili mo ma da tirì n̄biriku yaga. ¹¹ Yësu iya zi Petero henye, “I'dì kulu 'bèyì ne karani. Ma kuwè tëmì siko mati 'Bu i'dì zi ma.”

Ika Yësu zi Anasi

¹² Vo kanye 'ba Roma ehe vo kyèlu 'bènnì èti, ehe vo kanye 'ba yèkèlu èti, irinnì Yësu ehe idannì mo gö. ¹³ Zè obannì mo dagba zi Anasi, mo yawo 'ba Kayafa, kyedre 'ba vo karase mi koo nani. ¹⁴ Kayafa kölö nenyè ra ayada zi kyedree 'ba Yude henye, “Èdì na laka èzè vidi kölö maako oli kò'du vidi biya.”

*Petero iya henye na yɔlɔ Yësu dè
(Mt 26:69-70, Mk 14:66-68, Lk 22:55-57)*

¹⁵ Simona Petero ehe vo lö'bö maako aba usu ga Yësu. Vo lö'bö nani ayɔɔ kyedre 'ba vo karase, ehe usu ga Yësu le mī liɔ 'ba kyedre 'ba vo da karasa. ¹⁶ Petero alima yaga kara haresi. Mora vo lö'bö maako ayi hulëhu yaga ehe ame'do zi wu'jë 'ba haresi ne henye, “Mo mila Petero tī'bë loko.” ¹⁷ Mora ako'jo hɔ mo henye, “Anza dë kölö tēmī vo lö'bö 'ba kora nani?”

Petero aya'ba dɔ mo iya henye “E e manza dë.” ¹⁸ Gabi na kyëyi ehe vo lituwë ehe vo kanye 'ba yëkülü adrɔkonni wa'do kalili. Zë ëdinni rë nni koye toko ta rɔ mo, mati Petero i'bë ehe ɔɔ kara dakapa wa'do zi rë nī koye.

Kyedre 'ba vo karase ako'jo ha Yësu

(Mt 26:59-66, Mk 14:55-64, Lk 22:66-71)

¹⁹ Kyedre 'ba vo karase ako'jo ha Yësu kö'du vo lö'bö 'bɔmowe ehe kö'du yandi 'bɔmo. ²⁰ Mora Yësu ayada zi mo henye, “Ma me'do na dangölö ta da komo vidi biya, ehe 'duwi mëdi kö'du yandi mī bi 'ba mötu 'beze ehe mī yëkülü, bi ma Yude ayinni biya bi kölö. Miya kö'du maako dë na koho. ²¹ Kö'du a'di ra ëdi ha ma ko'jo? Kö'du a'di ako'jo ha vidi mati owonni ma ne dë? Zë ayɔlonni wa mati miya.”

²² Kandi mati Yësu iya nenyë, ma kölö tēmī vo kanye 'ba yëkülü otra mo ehe iya henye, “Nani anza dë gëri mati zi me'do zi kyedre 'ba vo karase.”

²³ Yësu aya'ba dɔ mo iya henye, “Ëzë miya wa maako ku na kyënyë, iya. Mora ëzë anza dë, kö'du a'di otra ma?”

²⁴ Yësu gba na kida, ehe Anasi utu mo zi Kayafa kyedre 'ba vo karase.

Petero andi löhu na yolo Yësu dë

(Mt 26:71-75, Mk 14:69-72, Lk 22:58-62)

²⁵ Mati Simona Petero ëdi tɔɔ ani rë nï kubï, vidï maako ako'jo hɔ mo henye, “Anza kôlô tēmï vo lö'böwë 'ba Yësu?”

Löhu Petero andi ehe iya henye, “E e, manza dë.” ²⁶ Kôlô tēmï vo litu 'ba kyedre 'ba vo karase ëdi ani. Mo na karo zi vo litu mati Petero ikye mbili mo yaga ne, ehe mo ako'jo henye, “Mongɔ yï dë mï yaka kora nani aba?” ²⁷ Löhu Petero andi, ehe zanga ayapa gbɔ.

Ika Yësu komo Pilato

(Mt 27:1-2, 11-14; Mk 15:1-5; Lk 23:1-5)

²⁸ 'Do nɔɔ damïndö aba oba mati Yësu kazi Kayafa zi loko mati vo daliɔ mï turu 'ba Roma alima. Mora Yude biya ëdinnï bi kida aba yaga, ga kö'du ëzë vidï tēmï zë i'bë mï loko ne, atayi na ti'da ehe ila mo dë zi wakonyo 'ba karama 'ba laga 'ba koli konyo. ²⁹ Pilato ayi yaga ehe ako'jo henye, “A'di ra na kyënyë ike kora nenye?”

³⁰ Zë ya'bannï henye, “Mo vo kö'du kyënyë ko'do! Kö'du nenye ra dika ze mo zi yï.” ³¹ Pilato ayada zi zë henye, “Obe mo ehe o'de vurë 'bomo mï kö'du ki'di 'be.” Yude aya'bannï henye, “Danza dangölö aba zi ki'di vidï maako zi kofo.” ³² Ehe here, wa mati Yësu iya kö'du kyinë koli 'bëni, atayi tinyö.

³³ Pilato i'bë hulëhu loko. Mo ako'jo Yësu zi nï ehe ako'jo henye, “Yi ra Yere 'ba Yude?” ³⁴ Yësu aya'ba henye, “Ëdi kö'du nenye ko'jo na bi dë yï, mandere vidï maako ra ayada kö'du ma zi yï?”

³⁵ Pilato iya henye, “Ayolo ku manza dë Yuda!

Vidi 'bëyiyë ehe kyedree 'ba vo karase ra ikanni yi zi ma. A'di ra o'do?"

³⁶ Yësu aya'ba henye, "Kalakonda 'bama anza dë zi damöku nenye. Èzë ëdì here, vo lö'bö 'bame ako'donni wehe zi sesi ma ta bi ki'di zi vo dagba 'bezee. E e, kalakonda 'bama anza dë zi damöku nenye."

³⁷ Pilato aya'ba henye, "Here, yi yere ra." Yësu ayada zi mo henye, "Yi ëdì akiya henye, ma yere. O'jo ma mi damöku nenye, zi yada kö'du tinyö ra, ehe vidi mati zi kö'du ma tinyö ayolo gu ma."

³⁸ Pilato ako'jo ha Yësu henye, "A'di ra tinyö?"

Ikye vurë zi Yësu kofo

(Mt 27:15-31; Mk 15:6-20; Lk 23:13-25)

Pilato i'bë hulëhu yaga ehe iya henye, "Mi'ja kora nenye dë kö'du kyënyë maako aba. ³⁹ Kyere ma 'duwi maboso kinga zi ye kadra karama 'ba laga 'ba koli aba, ombe zi ma kinga zi ye na dangölö Yere 'ba Yude?"

⁴⁰ Zë agbögbö hë nni, "E e, anza mo! Domba ze Barabasi." Barabasi ëdì na vo wehe 'ba turu.

19

Ikye vurë ra Yësu zi tötö

¹ Pilato i'di kö'du gbo zi Yësu ku'bö so'da aba.

² Vo kanye o'donni safo 'ba yere yaga tëmi ngora kono i'dinni da Yësu. Here zë usunni bongö 'buluyë ro mo. ³ Zë ayinni zi mo da kyö ehe iyanni henye, "He, yi Yere 'ba Yude!" Zë isanni mo kpa kala nni aba.

⁴ Kpa löhu Pilato i'bë yaga. Kadra nenye aba mo iya henye, "Ma kika Yësu zi ye yaga löhu,

here atɔ'be kongɔ na bi de henye, mi'ja mo dē kö'du kyënyë maako aba.”⁵ Yësu asi yaga usu safo 'ba yere kono bɔngɔ 'buluyë aba. Pilato iya henye, “Kinye kora ne ëdī.”

⁶ Mati kyedree 'ba vo karase ehe kanye 'ba yëkëlu ongonni mo, zë agbögbö hë nni iyanni henye, “Ma tötö mo da taka! Ma tötö mo da taka!” Pilato ayada zi zë, henye, “Obe mo, ehe atötöwë mo da taka. Mi'ja kö'du kyënyë ko'do 'bomo maako dë.”

⁷ Yude nee aya'banni henye, “Mo iya zi nī tēdī na Wisi 'ba Wiri! Kö'du ki'di 'beze iya henye, mi'di mo zi koli.”

⁸ Mati Pilato owo nenye, mo ndra na tere. ⁹ Mo i'bë hulëhu loko ehe ako'jo ha Yësu henye, “Yi ta kila?” Mora Yësu aya'ba dë. ¹⁰ Pilato ako'jo henye, “Kö'du a'di aya'ba da kö'du ko'jo 'bama ne dë? Ayɔɔ dë mēdī kyigɔ aba zi yi kinga na dangölö mandere yi tötö da taka?”

¹¹ Yësu aya'ba henye, “Ëzë Wiri i'di kyigɔ ne dë zi yi, ɔ'bo dë wa maako ko'do zi ma. Mora mo mati i'di ma zi yi, o'do ndra na kyënyë.”

¹² Here Pilato omba zi Yësu kinga na dangölö. Mora Yude agbögbö hë nni löhu, “Ëzë inga kora nenye ku na dangölö, anza dë aboka 'ba Yere 'ba Roma. Vidī maako mati iya zi nī tēdī na yere, vo wehe 'ba Yere 'ba Roma.”

¹³ Mati Pilato owo nenye, mo ika Yësu yaga. Here mo alima akaŋo da kyiti 'ba vurë bi mati ako'jo, “Yitö Dakaŋo.” Mī ha 'ba Hibiru ëdī “Gabata.” ¹⁴ Ëdī kaa kadra kutë mī ko'do, gba kazi karama 'ba laga 'ba koli, ehe Pilato iya zi vidī kayo nee henye, “Ongɔ bi da yere 'be!” ¹⁵ Zë

agbögbö hē nni henye, “Ofo mo! Ofo mo! Atötö mo da taka!” Pilato ako'jo henye, “Here ombe ma zi tötö yere 'be da taka?” Kyedree 'ba vo karase aya'banni henye, “Yere 'ba Roma ra yere 'beze.”
¹⁶ Here Pilato i'di Yēsu gbɔ zi tötö da taka.

Atötö Yēsu

(Mt 27:32-44; Mk 15:21-32; Lk 23:26-43)

Oba Yēsu 'de, ¹⁷ ehe mo injē taka 'bēni bi ma ēdi na yɔɔ henye, “Yingɔ da.” Ha 'ba Hibiru bi nenyē, ako'jo “Gologota.” ¹⁸ Ani atötö Yēsu gbɔ da taka, ehe dakapa mo da taka, atötö kora kpa riyyö, ma kölö kapa mo ma kölö, Yēsu mi kutē zē. ¹⁹ Pilato i'di kö'du zi kö'du kyēnyē ko'do 'ba Yēsu zi yöru da wa ehe ki'di riyyē da taka. Ako'jo henye, “Yēsu 'ba Nazereta, Yere 'ba Yude.”
²⁰ Me'do ne ayöru mi ha 'ba Hibiru, ha 'ba Lateni ehe ha 'ba Girigi. Bi mati oba Yēsu zi mo ne, anza na kɔwɔ ta ra gawo kyedre, ehe Yuda kayowe ako'jonnī kö'du yöru rɔ mo ne. ²¹ Here kyedree 'ba vo karase i'bēnni zi Pilato iya henye, “Kö'du a'di ayöru henye, mo Yere 'ba Yude? Akayöru kyere henye, ‘Mo iya zi ni tēdi na Yere 'ba Yude.’”
²² Mora Pilato ayada zi zē henye, “Wa mati ma yöru ku, ma lima here!”

²³ Tapēti vo kanye atötönni Yēsu ku da taka, zē inyenni mi bongo 'bomo sowo, ma kölö zi ma kölö tēmi zē. Mora bongo 'bomo ma ta yaga o'do tēmi nzoyi bongo kölö, anza dē kapa maako aba. ²⁴ Vo kanye iyanni zi oka ma kölö maako henye, “Dize dē, du'duwē födö aba zi kongɔ eyi ra akiri.” Nenyē o'do rē ni here zi wayöru tayi tinyö, mati iya henye, “Zē inyenni mi bongo ame ehe u'dunni

födö kö'du bongo ame.” Vo kanye o'donni wa mati zë ombanni.

²⁵ Ma 'ba Yësu owo dakapa taka 'bomo ëmi ni aba ehe Mariya mbara 'ba Kalapasi. Mariya Magadala ëdi kpa atoro ani. ²⁶ Mati Yësu ongo ma ni, ehe vo lö'bö mati mo owo mo ëti, mo iya zi ma ni henye, “Kora nenye yaanya aba wisi 'bëyi.” ²⁷ Here mo iya zi vo lö'bö ne henye, “Mo yaanya aba ma yi ra.” Tëmi ndenye dagba ani, vo lö'bö nani oba mo gbo lijo 'bëni.

Koli 'ba Yësu

(Mt. 27:45-56; Mk 15:33-41; Lk 23:44-49)

²⁸ Yësu ayolo henye, yaanya aba ninde loo 'bëni ku. Ehe zi ko'do wayöru tayi tinyö, mo iya henye, “Ma na kodro.”

²⁹ Siko ëdi ani ndo a'ji aba. Vidï maako usu lifa mi a'ji ne ehe injë riyë i'di ha Yësu kaga 'ba isipo aba. ³⁰ Tapëti Yësu uwë a'ji ne, mo iya henye, “Wa biya o'do rë ni ku!” Mo umbi dë ni ehe oli.

Isi roto Yësu

³¹ Yaanya aba ëdi ko'do 'ba rak'jo, 'dö ko'do 'ba ralawo ehe karama 'ba laga 'ba koli. Èdi ko'do lele zi Yude, ehe zë ombanni dë zi ida ra nee zi lima riyë da taka mi ko'do nenye. Here zë ako'jonnï ha Pilato zi ndi kora nee kowe ehe koba ida rë zë akaño. ³² Vo kanye dagba owenni ndi 'ba kora agamowe riyö mati atötö zë ani ne. ³³ Mora mati zë ayinni zi Yësu, zë ongönni mo oli ku nzo, ehe zë owenni ndi mo dë. ³⁴ Ma kölö tëmi vo kanye isi mbese Yësu wehe aba, yama ehe wini asi yaga. ³⁵ Da yolo nenye ëdi tinyö, ga kö'du vidï maako ra ayada wa mati mo ongo

o'do rē nī. Yaanya aba ato'bo tēdi kpa koma aba. ³⁶ Biya nenyē o'do rē nī here, zi wayōru tayi tīnyō, mati iya henyē, “Yingō 'ba ida rō mo ma kōlō akowe dē,” ³⁷ ehe “Zē ongōnni ma kōlō mi dakapa mbese mo isi wehe aba.”

Kusu 'ba Yēsu

(Mt 27:57-61; Mk 15:42-47; Lk 23:50-56)

³⁸ Yosepa tēmī Arimataya ēdi kōlō tēmī vo lō'bō 'ba Yēsu. Mo asesi na koho, le ga kō'du mo na tere kazi vo dagbe 'ba Yude. Mora yaanya aba mo ako'jo ha Pilato zi mo ida ra Yēsu koba. Pilato i'di dangōlō zi mo, ehe Yosepa oba mo akaṅo ta da taka. ³⁹ Nikodīmō ayi nī mo aba, ehe ika kpa kaa 'butēwota kilōgaramo 'ba wakēzi ngutru aba o'do tēmī murē ehe aloyisi 'ba yōku kusu. Nenyē kpa te Nikodīmō kōlō mati i'bē zi Yēsu yōndō kōlō maako aba. ⁴⁰ Vidi kora riyō nee, olonnī ida ra ne mi bōngō 'ba yōku, bi kōlō wakēzi ngutru aba, mati ēdi hala Yude ombennī yōku 'bēnni. ⁴¹ Mi bi mati atōtō Yēsu da taka, ani yaka ēdi wogo aba mati gba ombē vidi maako dē mi mo. ⁴² Dawogo ne ēdi kara, ehe kyere ne kadra 'ba zi ra kō'jo kō'du kō'do 'ba ralawo, zē na kōrōkōrō zi ida ra Yēsu ki'di ani.

20

Yēsu na didi

(Mt 28:1-8; Mk 16:1-8; Lk 24:1-12)

¹ Ko'do 'ba Gima aba ṅbo mati bi gba na kōndu, Mariya Magadala i'bē dawogo ehe ongō henyē, yitō alulu ku 'de, ta ha bi tōdu 'ba dawogo. ² Mo aho zi Simona Petero ehe zi vo lō'bō mati Yēsu

ɔwɔ ehe iya henye, “Zë obannî Yere ku tëmî dawogo! Da yɔlɔ dë i'dinnî mo ku kila.”

³ Petero ehe vo lö'bö maako aba ayetonni ti'bë dawogo. ⁴ Zë ahonni ta bi kölö, le vo lö'bö maako ne aho ndra ta da Petero ehe ɔkɔ ani dagba. ⁵ Mo idë rë ni ehe ongo bongɔ konda na lala loko mi dawogo, mora mo i'bë dë loko. ⁶ Mati Simona Petero ɔkɔ ani, mo i'bë mi dawogo ehe ongo bongɔ konda ne. ⁷ Mo ongo nzoyi bongɔ mati o'dɔ zi komo Yësu yöfu mo aba ne. Aköku ku ehe mi bi mati na bi dë ni. ⁸ Vo lö'bö mati ɔkɔ dagba ani ne i'bë mi dawogo, ehe mati mo ongo, mo oma. ⁹ Mi kadra nani Petero ehe vo lö'bö maako ne, ayɔlonni dë henye, wayöru iya henye Yësu atënyi na didi. ¹⁰ Here zë riyö ne i'bënni hulëhu zi vo lö'bö maakowe.

*Yësu alaya zi Mariya Magadala
(Mt 28:9-10; Mk 16:9-11)*

¹¹ Mariya Magadala ɔrɔ kudu yaga dakapa dawogo. Mo ëdi gba kudu, mati mo idë rë ni akaɲo ¹² ehe ongo malayike riyö loko. Zë usunni bongɔ kanyi ehe ëdi alimanni bi mati i'di ida ra Yësu 'dɔmo. Ma kölö bi dɔ mo ehe ma agamo bi ndi mo. ¹³ Malayika nee ako'jonni ha Mariya henye, “Kö'du a'di ëdi akudu?” Mo aya'ba dɔ mo henye, “Zë obannî ida ra Yere ama ku 'de, ma yɔlɔ dë i'dinnî mo kila.”

¹⁴ Kandi mati Mariya iya nenye, mo ofɔ rë ni kpo ehe ongo Yësu ëdi atɔrɔ ani. Mora mo ayɔlɔ dë, mo 'bëni ëyi. ¹⁵ Yësu ako'jo hɔ mo iya henye, “Ëdi akudu ga a'di? Ëdi ëyi ra koma?” Mo asösu 'bëni mo vo kyeti yaka ra ehe iya henye, “Kyedre,

ëzë obe ida rɔ mo ku 'de, ako ayada zi ma, here ma tɔ'bo ti'bë mo koba.”

¹⁶ Here Yësu iya zi mo henye, “Mariya!” Mo ofo rè nì ehe iya zi mo henye, “Raboni.” Ha 'ba Hìbìru aba “Raboni” vo “Komoyandi.” ¹⁷ Yësu ayada zi mo henye, “Ise ra ma dë! Mi'bë dë gba zi 'Bu. Mora ayada zi vo lö'bö 'bame mëdi ati'bë zi mo mati na 'Bu ma ehe Wirì 'bama, kpa 'Bu wë ehe Wirì 'be.”

¹⁸ Mariya Magadala i'bë ayada zi vo lö'böwë nongɔ Yere ku. Mo ayada kpa zi zë wa mati mo iya zi nì.

Yësu alaya zi vo lö'bö 'bënyë

(Mt 28:16-20; Mk 16:14-18; Lk 24:36-49)

¹⁹ Vo lö'böwë na tere kazi vo dagbe 'ba Yude, ehe mi hutaga 'ba Gima kölö nani, zë isi gë nnì loko. Truku'du, Yësu alaya mi kutë 'ba gboko. Mo amëtë zë iya henye, “Rakyëyi mëdi yë aba.”

²⁰ Ehe ayada kala niyë zi zë ehe mbese nì. Mati vo lö'böwë ongɔnni Yere, zë biya na rakyenyi.

²¹ Tapëti Yësu amëtë zë löhu, “Rakyëyi mëdi yë aba,” mo iya henye, “Mëdi yë kutu kaa 'Bu utu ma.” ²² Here mo alawo dë zë ehe iya henye, “Ìriyë Lawo Laka. ²³ Èzë ile vidi maako ku ga kö'du kyënyë, akila zë. Mora ëzë ile kö'du kyënyë 'bëzë dë, ila zë dë.”

Yësu ehe Toma

²⁴ Toma ma ako'jo “vo loja” ëdi le kölö tëmi vo lö'bö 'butë dɔmoriyö, mo anza dë agamo ëti mati Yësu alaya zi zë. ²⁵ Here zë ayadanni zi mo henye, “Dongɔ ze Yere ku.”

Mora Toma iya henye, “Dagba, momba kongɔ tēpī ɔŋɔ 'ba nosomari mī kala mo ehe kise zē dawisi kala ma aba. Ma kī'dī kala ma bi mati wehe i'bē da mbese mo. Moma dē, nje ēzē mo'do nenyē ku!”

²⁶ Tapētī ko'do 'ba Gima kōlō yaa, vo lō'bō atɔɔ rē nnī lōhu bi kōlō. Kadra nenyē aba, Toma ēdī zē aba. Yēsu ayi loko mati ha loko gba na kisi ehe ɔɔ mī kutē 'ba gboko ne. Mo amētē vo lō'bō 'bēniyē, “Rakyēyi mēdī yē aba.” ²⁷ Mo iya zi Toma henye, “ī'dī dawisi kala yī kinye, ehe onɔ bi da kala me. ī'dī kala yī da mbese ma. ɔɔ tēmī da jiji 'bēyi ne, ehe oma!”

²⁸ Toma aya'ba do mo iya henye, “Yi Yere ama, ehe Wirī ama!” ²⁹ Yēsu iya henye, “Toma, oma ga kō'du onɔ ma ku? Vidī mati ēdinnī koma aba mī ma kazi ma kongɔ, ēdī zē mati tinyō ya'da aba!”

Kō'du a'di Yowani Ayōru Buku Ēnī

³⁰ Yēsu o'do kyinē 'ba kō'du koro ko'do maakowe kyɔ mati vo lō'bō 'bɔmowe onɔnnī, ehe anza zē biya ayōru ku mī buku nenyē.

³¹ Mora ma nenyee ayōru here zi ye kī'dī koma 'be mī Yēsu na Korisito ne, Wisi 'ba Wirī. Ēzē ēdiyē koma aba mī mo, atēdiyē didī aba mī ru 'bɔmo.

21

Yēsu alaya zi vo lō'bō 'bēniyē

¹ Yēsu yaa alaya zi vo lō'bō 'bēniyē da gōtī Fōfō 'ba Tiberiyasi. O'do rē nī mī gērī nenyē. ² Simona Petero, Toma ma ako'jo “vo loŋa,” Natanēlē ta

Kana mi Galilaya, gisi 'ba Zebedeyo edinni ani, bi kolö aga vo lö'bö maako eti riyö. ³ Simona Petero iya henye, “Medi ti'bë kyenze kiri!”

Maakowe iyanni henye, “Da ti'bë ze yi aba.” Zë i'benni yaga mi tönbö 'benni. Mora du irinni wa maako de yondo nani aba. ⁴ Nbo mi damindo vere, Yesu owo da göti, mora vo lö'böwë ayolönni de mo eyi ra. ⁵ Yesu agbögbö he ni, “Aboke, iriyë wa maako ndö?” Zë aya'banni henye, “E e.”

⁶ Here mo ayada zi zë henye, “Umëë öndu 'be ne akaño da kala tiri 'ba tönbö 'be, ehe akiriyë kya 'ba kyenze maakowe.” Zë o'dönni here, ehe öndu gbö kyö na kyenze, here zë o'bönni de zi kotö riyë mi tönbö.

⁷ Vo lö'bö mati Yesu owo ne, iya zi Petero henye, “Nenye Yere ra.” Mati Petero owo ne Yere ra, mo usu bongö mati mo otö, mati mo edi löö ko'dö ne. Here, mo öfu mi wini. ⁸ Tönbö edi nje kaa lamikölö mitiri ta da göti. Here vo lö'bö maakowe alimanni mi tönbö, ehe otönni öndu mi mo kyö kyenze aba. ⁹ Mati vo lö'böwë asinni yaga temi tönbö, zë ongönni mangöb'bo ehe wa'do 'ba kalili kyenze aba dö mo. ¹⁰ Yesu ayada zi vo lö'bö 'beniyë henye, “Ike kya 'ba kyenze maakowe mati iriyë ne.”

¹¹ Simona Petero i'bë hulëhu mi tönbö ehe otö öndu da göti. Mi mo kyenze ma kyedre edinni lamikölö butëmuyi domowota, mora öndu gba kazi liza. ¹² Yesu iya henye, “Ayiye ehe onyowe.” Mora vo lö'bö ma kolö maako ako'jo de, mo eyi ra. Zë ayolönni mo Yere ra. ¹³ Yesu oba mangöb'bo mi kala ni ehe i'di kya maakowe zi vo lö'bö 'beniyë. Mo o'dö kyenze ne kpa te here.

14 Nenye mi kadra mawota mo ra Yësu alaya zi vo lö'bö 'bëniyë tapëti mo ënyi tëmi koli.

Yësu ehe Petero

15 Mati Yësu vo lö'bö 'bëni ëti indenni wakonyo ku, mo ako'jo henye, “Simona wisi 'ba Yowani, ɔwɔ ma ndra ta da oka maakowe?” Simona Petero aya'ba henye, “Ɔɔ, Yere, ayɔlɔ ku mɔwɔ yi!” Yësu iya henye, “Here, ulu timëlë ame.”

16 Yësu ako'jo madariyö mo, “Simona wisi 'ba Yowani, ɔwɔ ma?” Petero aya'ba henye, “Ɔɔ, Yere, ayɔlɔ mɔwɔ yi!” Yësu ayada zi mo henye, “Here, ongo ga timëlë ame.”

17 Yësu ako'jo mi da mawota mo henye, “Simona wisi 'ba Yowani, ɔwɔ ma?” Petero na rasösu ga kö'du Yësu ako'jo ho mo mawota ëzë mo ɔwɔ ni. Here mo ayada zi Yësu henye, “Yere, ayɔlɔ kö'du biya. Ayɔlɔ mɔwɔ yi.”

Yësu aya'ba henye, “Ulu timëlë ame. 18 Ma yada tinyö zi yi henye, mati yi gba na wisi kora obi, usu rë yi ehe i'bë bi mati omba zi ti'bë. Mora mati endro ku, akiza yaga kala yi. Here, maakowe akidanni kɔ'di gë yi toko rë yi ehe akalëpi zi yi dagba bi mati omba dë zi ti'bë.”

19 Yësu iya nenye zi yada hala Petero akoli ehe akika wayeto zi Wiri. Here mo iya zi Petero, “Usu ga ma.”

Yësu ehe vo lö'bö maako ëti

20 Petero opi rë ni ehe ongo vo lö'bö mati Yësu ɔwɔ ne, usu ku gë ni. Mo ra kpa te mati alima kara zi Yësu bi 'ba wakonyo, ehe ako'jo henye, “Yere, ëyi ra ëdi ti'bë zi yi susu?” 21 Mati

Petero ongo vo lö'bö nenyé, mo ako'jo ha Yësu iya henyé, “Yere, a'di kö'du mo?”

²² Yësu aya'ba henyé, “Kö'du sösu 'bëyi ëdi a'di, ëzë momba mo zi lima le ma'ba? Usu ga ma.”

²³ Here, ndondó apere rë nï mï kutë vo lö'bö maakowe henyé, vo lö'bö nenyé oli dë. Mora Yësu iya dë mo oli dë. Mo iya nje henyé, “Kö'du sösu 'bëyi ëdi a'di?”

²⁴ Vo lö'bö nenyé ra mo ayada kö'du nenyé biya. Mo ayöru, ehe da yolo mo ëdi kö'du tinyö ra yada.

Ndundu mo

²⁵ Yësu o'dó wa maakowe kyó. Èzë ayöru zë biya mï bukuwë, ma sösu henyé, bi atanza dë mï damöku ne kö'du buku nee biya.

Morokodo
Portions of the Holy Bible in the Morokodo language
of South Sudan

copyright © 2010 Pioneer Bible Translators

Language: Morokodo

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files dated 29 Jan 2022

b81b7ca7-810b-5cb2-913f-b28f08d9c01d